

摘藻堂四庫全書薈要

集部

欽定四庫全書薈要

集部

中州集卷十

詳校官候選知縣臣吳回華



欽定四庫全書
奮要卷二萬八十三集部

中州集卷十

癸集

金元好問輯

知已

溪南詩老辛愿 二十首

愿字敬之福昌人其大父自鳳翔來居縣西南
女几山下以力田為業敬之自號女几野人年
二十五始知讀書取白氏諷諫集自試一日便



能背誦乃聚書環堵中讀之書至伊訓詩至河
廣頗若有所省欲罷不能因更致力焉音義有
不通者搜訪百至必通而後已有一事闕十年
者由是博極羣書於三傳為尤精至於內典亦
稱該洽杜詩韓筆未常一日去其手作文有綱
目不亂詩律深嚴而有自得之趣性野逸不修
威儀貴人延客敬之麻衣草屨足脛赤露坦然
於其間劇談豪飲旁若無人高獻臣為河南治

中聞其名引為上客及獻臣為府尹所誣敬之亦被訊掠幾被一網之禍自是人以敬之之名為諱絕不與交不二三年日事大狼狽田五六十畝歲入不足一牛屢為追胥所奪竟賣之以為食衆雖嗷嗷張口待哺雅負高氣不能從俗俯仰迫以饑凍又不得不與世接其枯槁憔悴流離頓踣往往見之于詩元光初予與李欽叔在孟津敬之自女儿來為之留數日其行也欽

叔為設饌備極豐腆敬之放箸而歎曰平生飽
食有數每見吾二弟必得美食明日道路中又
當與老飢相抗去矣會有一日辛老子僵卧柳
泉韓城之間以天地為棺槨日月為含襚狐狸
亦可螻蟻亦可耳予二人為之惻然敬之佳句
極多如自憐心似魯連子人道面如裴晉公萬
事直須稱好好百年端欲付休休院靜寬留月
窻虛細度雲浪翻魚出浦花動鳥移枝之類恨

不能悉記耳

木栖云吟窗醉几秋風晚只許幽人箇裏知三鄉光武廟云方山青

遠一川斜到其處知為工也

予嘗論敬之士之有所立必藉

國家教養父兄淵源師友講習三者備而後可
喻如世之美婦多出於膏腴甲族薰醲含浸之
下閭閻間非無名色一旦作公夫人則舉步羞
澀曾大家婢不如其理然也故作新人材言教
育也獨學無友言講習也生長見聞言父兄也
至於傳記所載西子乃苧蘿山采薪氏之女越

君臣教之容止七日而納之王遂能惑夫差傾
吳國豈常理也哉敬之落落自拔耿耿自信百
窮而不憫百辱而不沮任道致遠若將死而後
已者三十年亦可謂難矣南渡以來詩學為盛
後生輩一弄筆墨岸然以風雅自名高自標置
轉相販賣少遭指摘終死為敵一時主文盟者
又皆汎愛多可坐受愚弄不為裁抑且以激昂
張大之語從臾之至比為曹劉沈謝者肩摩而

踵接李杜而下不論也敬之業專而心遁敢以
是非白黑自任每讀劉趙雷李張杜王麻諸人
之詩必為之探源委發凡例解絡脉審音節辨
清濁權輕重片善不掩微類必指如老吏斷獄
文峻網密絲毫不相貸如衲僧得正法眼徵詰
開示幾於截斷衆流人有難之者則曰我雖不
解書曉書莫如我故始則人怒之罵之中而疑
之已而信服之至論朋輩中有公鑒而無姑息

者必以敬之為稱首盖不本於教育不階於講習不出於父兄而卓然成就如此然則若吾敬之者真特立之士哉

劉景玄趙宜之雷希顏李致叔張仲經杜仲梁王仲

澤麻

知幾

亂後

兵去人歸日花開雪霽天川原荒宿草墟落動新煙困鼠鳴虛壁飢烏啄廢田似聞人語亂縣吏已催錢

贈趙仲常

名憲宜之從弟詩有黃塵裊裊時隨脚華髮蕭蕭老鑿頭之句

趙子年雖小論詩樂最深秋風凡幾首冬日更多吟老
大吾無力文章爾用心荒山松竹底莫賦數相尋

過崧山

催老年光袞袞來好懷知欲向誰開箕山潁水春風裏
呼起巢由共一杯

隆德故宮

馳分鹿死已無秦五十年來漢苑春問著流鶯無一語
柳條依舊拂墻新

同趙長水汎舟

洛水秦山晚自澄，孤洲煙樹綠相仍。
波搖朗月浮金鏡，嶺隔華星斷玉繩。
但覺轉船驚白鳥，豈煩揮翣怒青蠅。
風塵浩蕩飄蓬裏，愧似林宗陪李膺。

山寒

山寒春靜早關門，新月微光照短垣。
可恨算雲欺落景，却將殘靄助黃昏。

陋室

陋室何妨似燕窠暮年終得逐魚蓑壺中日月時常好
枕上功名不足多往古來今真夜旦高天厚地一豈羅
鹿門幸有龐公樂牛角徒為甯戚歌

亂後還三首

兵戈為客苦思鄉春暮還鄉却自傷典籍散亡山閣冷
松筠憔悴野園荒鶯銜晚色啼深樹燕掠春陰入短墻
鄰里也知歸自遠競將言語慰淒涼

又

亂後還家春事空
樹頭無處覓殘紅
棠梨妥雪霑新雨
楊柳聽綿颺晚風
談笑取官驚小子
艱難為客媿衰翁
殘年得見休兵了
收拾閒身守桂叢

又

春來漂泊心情減
老去艱危氣力微
芳草際天愁思遠
干戈滿地故人稀
懷金躍馬時何有
問舍求田事已違
糲食敝衣聊自足
白頭甘息漢陰機

題游彥明林園三首

先生未老厭儒冠築屋栽籬守歲寒經史日長常滿案
魚蝦溪近得供盤幽花入室無多種瘦竹關情只數竿
蕭洒遠辭車馬跡求官何必近長安

又

城郭繁華斷往還林園幽間養高閒花低暖藥斜窺水
竹亞晴梢巧避山尊俎歲時君得意風埃南北我何顏
丹房藥鏡游心久不惜哀矜洗病孱

又

不礙遙看冷翠微
儘教敲竹映窻扉
籬根傍水知魚樂
屋角隣花鳥自歸
濁酒野芹安已久
華軒高馬到從稀
人間回首皆堪鄙
羨汝幽棲得所依

贈劉庵主

劉遠
貴族

蚤薄軒裳貴
高尋綺皓蹤
一囊閣里藥
六尺水雲筇
午枕眠芳景
晴簷望遠峯
柴門常不掩
應得野夫從

函關

雙峯高聳大河旁
自古函關一戰場
紫氣久無傳道叟

黃塵那有棄繻郎
煙迷短草秋還綠
露浥寒花晚更香
共說河山雄百二
不堪屈指算興亡

贈趙宜之二首

夫子今詞伯
胡為遠帝京
青雲無躡迹
白髮有柴荆
鬼戲多年病人
高四海名麟
經方有缺無
惜繼丘明

又

轉徙家無地
逢迎客有尊
光陰連病枕
天地一愚軒
霜雪青松古
風塵白壁溫
從渠投隙者
袞袞向金門

送裕之往許州酒間有請予歌渭城朝雨者因及之

白酒留分袂青燈約對床言詩真漫許知己重難忘爽氣虛韓岳文星照許昌休歌渭城柳哀老易悲傷

寄裕之

青雲一別阮家郎甚欲題詩遠寄將好句眼前常蹉過佳人心上不曾忘誰家秋月茅亭底何處春風錦瑟旁昌谷煙霞久寂寞歡遊還肯到三鄉

山園

歲暮山園懶再行
蘭衰菊悴頗關情
青青多少無名草
爭向殘陽暖處生

李講議汾二十五首

汾字長源平晉人系出雁門曠達不羈好以奇
節自許避亂入關京兆尹子容愛其才招致門
下留二年去之涇州謁張公信甫一見即以上
客禮之自是游道日廣然關中無一人敢與相

軒輊者元光末用薦書得從事史館舊創史院
有監修宰相為之同修翰長至直學士無之編
修官專纂述之事若從事則職名謂之書寫特
抄書小史耳凡編修官得日錄分受之纂述既
定以藁授從事從事錄潔本呈翰長平居無事
則翰長及從事或列坐飲酒賦詩一預史事則
有官長掾屬之別長源素高亢不肯一世乃今
以斗食故人以府史蓄之殊不自聊高張諸人

率以新進入館史家凡例或未能盡知就其所
長且不滿長源一笑故刊脩之際長源在旁則
蓄縮慘沮握筆不能下長源正襟危坐讀太史
公左丘明一篇或數百言音吐洪暢旁若無人
既畢顧四坐漫為一語云看秉筆諸人積不平
而雷李尤所切齒乃以嫚罵官長訟于有司然
時論亦有不直雷李者故證左相半踰年不能
決右丞師公以傷風化為嫌遣東曹掾置酒和

解之不得已乃罷尋入關明年駟數馬來京師
日以馬價佐歡道逢怨家則畫地大數而去又
明年恒山公仙在鄧之西山長源往說之署行
尚書省講議官既而恒山與參知政事思烈相
異同頗謀自安懼長源言論欲除之適之泌陽
竟為所害長源孝友廉介過人者甚多寧寒餓
而死終不作寒乞聲向人人亦以此愛之平生
以詩為專門之學其所得為尤多如洛陽才子

懷三榮長樂鐘聲又一年清鏡功名兩行淚浮
雲親舊一囊錢煙波蒼蒼孟津渡旌旗歷歷河
陽城長河不洗中原恨趙括元非上將才三輔
樓臺失歸燕上林花木怨啼鵲空餘一掬傷時
淚暗墮昭陵石馬前同輩作七言詩者皆不及
也辛卯秋遇子襄城盃酒間誦關中往來詩十
數首道其流離世故妻子凋喪道塗萬里奔走
狼狽之意雖辭旨危苦而耿耿自信者故在鬱

鬱不平者不能掩清壯磊落有幽并豪俠歌謠
慷慨之氣此詩兵火中散亡今就其少作予所
能記憶者錄之

陝州

黃河城下水澄澄送別秋風似洞庭李白形骸雖放浪
并州豪傑未凋零十年道路雙蓬鬢萬里乾坤一草亭
八月崑陵霜樹老傷心休折柳條青

州北

州北光風艷綺羅南來扈從北人多梨園法曲懷奴舞
月窟新聲倩女歌紫禁衣冠出金馬青樓阡陌瞰銅駝
薄游却憶開元日常遂春風醉兩坡

再過長安

細柳斜連長樂坡故宮今日重經過一時人物存公論
萬里雲山入浩歌白髮歸來幾人在青門依舊少年多
自憐季子貂裘敝辛苦燈前讀揣摩

汴梁雜詩四首

天津橋上晚涼天鬱鬱皇州動紫烟長樂觚稜青似染
建章馳道直于絃犬牙磐石三千國聖子神孫億萬年
一策治安經濟了漢庭誰識賈生賢

又

琪樹明霞五鳳樓夷門自古帝王州衣冠繁會文昌府
旌戟森羅部曲侯美酒名謳陳廣座凝笳咽鼓送華輶
秦川王粲何為者憔悴鴛鴦座坐白頭

又

樓外風煙隔紫垣
樓頭客子動歸魂
飄蕭蓬鬢驚秋色
狼籍麻衣浣酒痕
天塹波光搖落日
太行山色照中原
誰知滄海橫流意
獨倚牛車哭孝孫

又

寥落關山對月明
客窻遙夜夢魂驚
二年岐下音書絕
八月河南風露清
冉冉莫愁生草色
迢迢秋思入蟲聲
誰知廣武英雄歎
老却窮途阮步兵

上清宮三首

憶昔秋風從茂陵
詞臣忝預漢公卿
瑤池晏罷西王母
翠輦歸來北斗城
石馬嘶殘人事改
劫灰飛盡海山平
唯餘太一池邊月
伴我驂鸞上玉京

又

蒼梧雲氣赤城霞
綿絡鈞天帝子家
仙掌高承九霄露
霓旌遙駐五雲車
昆明火劫驚人世
瀛海風濤撼客槎
醉裏忽逢王子晉
玉笙吹上碧桃花

又

千劫塵緣謝吏曹
道山仙闕事遊遨
樓臺縹緲滄溟濶
宮殿森羅紫極高
幾代雲孫接仙李
千年王母醉蟠桃
詩成便欲還山去
猶待君王賜錦袍

避亂陳倉南山回望三秦追懷淮陰侯信漫賦長句

憑高四顧戰塵昏
鷄野山川自吐吞
渭水波濤喧隴阪
散關形勢輒興元
旌旗日落黃雲戍
弓劍霜寒白草原
一飯悠悠從漂母
誰憐國士未酬恩

雪中過虎牢

蕭蕭行李憂弓刀踏雪行人過虎牢
廣武山川哀阮籍
黃河襟帶控成臯身經戎馬心逾壯
天入風霜氣更豪
橫槩賦詩男子事征西誰為謝諸曹

清明

鳴珂振轂滿重城春日綿綿老燕鶯
人在碧雞坊外住
澹隨流水過清明

下第

學劍攻書謾自竒回頭三十六年非春風萬里衡門下
依舊并州一布衣

磻溪

封侯輸與曲如鉤冷坐磻溪到白頭老婦厨中莫彈鋏
白魚留待躍王舟

感寓述史雜詩五十首

并引
錄五首

正大庚寅予行年三十有九獻賦明庭為有司
所病遂有不遇時之歎卓衣斗食從事史館以

素非所好愈鬱鬱不得志卧病中僻居蕭條盡
日無來人緬惟先哲凡所以進退出處之際窮
達榮辱之分立身行道建功立事關諸人事者
竊有所感焉於是始自騷人屈平以來下逮漢
晉隋唐諸公終之以遠祖雁門武皇作為述史
詩五十首以自慰其羈旅流落之懷述近代則
恐涉時事故斷自唐以下不論嗚呼三百篇大
抵皆聖賢感憤之所為作也余以愚忠謬信護

譏于斯世久矣非敢示諸作者庶幾後世有揚
子雲者出或能亮予之宿心是歲秋七月既望
并州人李汾引

蘇客卿秦

游說諸侯獲上卿賈人脣舌事縱橫可憐一世癡兒女
爭羨腰間六印紫

韓淮陰信

仗劍淮陰去復還舉頭西望識龍顏堂堂竟握真王印

未害男兒辱勝間

叔孫奉常通

秦時博士魯諸生漏網驪山百丈阮邂逅劉郎習綿蕪
便能彈壓漢公卿

馬中令周

脚踏長安陌上塵布衣西上欲誰親君王不省常何策
憔悴新豐一旅人

遠祖雁門武皇

死心唐室正諸侯鐵馬南來隘九州當日三垂岡上意
諸孫空抱腐儒羞

擬張水部行路難

洛陽行人心欲折半年西州信音絕彈箏峽口兵塵高
半夜心懸隴山月君不見嗷嗷失羣鳥淚盡眼流血潼
關晝閉漢使稀安得慰我生離別

雲溪曉汎圖

曉景澹明月落影潭西丘晴川挂煙樹光拂雲河流楓

林入行色關山生白頭羨羨畫中人憶我秦川游君帆
渺何許儻下滄浪洲滄浪吾有約寄謝同盟鷗

古月一篇為裕之賦

古月天不收敵君三萬秋天孫弄明鏡光湧雲間流憶
筭放逐江南州金陵女兒歌權謳草裹烏紗巾散著紫
綺裘酒酣把玉笛直欲捫參厯井騎斗牛醉中呼兒搖
雙舟吾欲乘流下石頭起來茫茫視八極萬里只有元
丹丘丹丘子游人間風塵何為復往還玉華山人近招

我九日朝帝蒼梧山

西歸

擾擾王城足是非不堪多病決然歸只因有口談時事
幾被無心觸禍機日莫豺狼當路五天寒鷓鴣傍人飛
終南山色明如畫何限春風筍蕨肥

避亂西山作

三月都門畫不開兵塵一夕捲風回也知周室三川在
誰復秦庭七日哀鴉啄新豐下陽翟草銜冤血上琴臺

夷門一把平安火定遂恒山候騎來

李戶部獻甫 一十三首

獻甫字欽用欽叔從弟也兄欽止欽若皆中朝名勝家故將種而同時四進士人門之秀照映一時欽用博通書傳於左氏及地理之學為精為人有幹局心所到則絕人遠甚故時人有精神滿腹之目歷咸陽簿辟行臺掾屬正大初夏人請和朝廷以馮子駿往議欽用預行夏使有

口辯馮善人無以折之往復之際至以歲幣為
言欽用不能平從旁進曰夏國與敝邑和好百
年今雖易君臣之名而為兄弟之國使兄而輸
幣寧有據耶曰兄弟且不論宋日曾與吾家二
十五萬匹典故具在君獨不知耶金朝必欲脩
舊好非此例不可欽用作色曰使者尚恐言耶
宋以歲幣餽君家而賜之姓岸然以君父自居
夏國君臣無一悟者誠謂使者當以為諱乃今

公言之使者果能主此議以從賜姓之例敝邑
雖歲捐五十萬某請以身任之夏使語塞和議
乃定使還朝廷錄其功授慶陽總帥府經歷官
尋辟長安令京兆行臺所在供須之繁急于星
火欽用所以處之者常若有餘縣民賴之以安
入為尚書省掾壬辰之兵奏充行六部員外郎
守備之榮時相倚任之以功遷鎮南軍節度副
使兼右警巡使車駕東巡死于蔡州之難時年

四十所著詩書文號天倪集者留京師欽用死
其家亦破非同年華陰王元禮購得之幾有人
琴俱亡之恨然則文字言語之傳與否亦有數
存於其間耶

夏夜

銀潢淡淡沒疎星
一陣涼從雨後生
仰看浮雲成獨卧
數圍蛛網絡中庭

九龍池春望

五年外地看清明袖手低回過客亭謝絮楚萍無定著
春光如我更飄零

興慶池書所見

短短荇蒲刺水青翠萍開處鑑波明畫船轉過垂楊外
水面風來聞樂聲

題黃華幽居圖

層層佛屋貼山腰山下幽居勝午橋物外人家無稅役
閒中生理足漁樵雁踰遠障凌空迥人與高秋共寂寥

何處人間景如此便應歸隱不須招

長安行

長安道無人行黃塵不起生榛荆高山有峰不復險大
河有浪亦已平向來百二秦之形祇今百二秦之名我
聞人固物乃固人不為力物乃傾將軍誓守不誓戰戰
士避死不避生殺人飽厭敵自去長安有道誰當行黃
塵漫漫愁殺人但見蔽野雞羣鳴河東游子淚如雨眼
花落日迷秦城長安道無人行長安城中若為情

別春辭

東皇按轡來何遲
人間二月才芳菲
六十日春能幾時
不如意事常相隨
一聲啼鴉花片飛
把酒却與春別離
春緩歸聽我歌
滔滔歲月如流波
貴憂孰與賤樂多
吾寧不欲列華鼎
馳鳴珂
香屏倚妓薦綺羅
人生賦分有定在
誰能買愁費天和
長安市上酒如海
跨驢徑上胭脂坡
酒酣酣舞雙婆婆
春自來去如予何

秋風怨

疎星耿耿明天河夜涼翠幕生微波碧梧委葉傳金井
一夕秋風將奈何春風令人和秋風感人悲妾愁自與
秋風期秋風爭管人別離燈炷垂紅粉泥暗龜甲屏風
雲影亂絡緯弔月啼不斷逆漏壓荷夜未半涼颼蕭蕭
入疎竹枕底寒聲碎瓊玉敲愁撼睡睡不明花露盈盈
泣魚目秋風且莫吹念妾守空閨嫁狗隨走雞隨飛九
死莫作蕩子妻郎薄倖妾薄命花自無言絮無定碧雲
算合郎未歸幾度粧成掩明鏡

河上之役三首

河堤一決豈天窮
失在當年固白公
誰與麻岡開故道
暫教版籍見山東

又

新築河堤要榮勳
萬人採淨北壩薪
青青好借曹州柳

舊是中原一段春

曹陷沒
已久

又

萬夫卷土障橫流
負土成山水未收
明日落成真盛事

誰能作賦擬黃樓

圍城

碧樹蒼烟起暮雲
長安陌上斷行人
百年王氣餘飛觀
萬里神州隔戰塵
身與孤雲向雙闕
愁隨落日到咸秦
山河大地分明在
莫為時危苦愴神

驟雨

龍戰雲塵擁日囚
鞭驅雷電走蛟虬
望中雨脚橫天落
觸處湍聲卷地流
梁苑樓臺失炎暑
漢家城闕動高秋

若為借得天瓢去倒瀉明河淨九州

資聖閣登眺同麻杜諸人賦

高閣凌雲眼界寬
野烟碧樹有無間
天邊孤鳥飛不盡
陌上行人殊未還
魏國幾回時事改
汴堤千古夕陽閒
愁來重倚闌干望
崧少西頭是故山

南冠五人

司馬侍郎朴一首

朴字文季溫公之猶子
宋兵部侍郎以奉使見

留居于祁陽授以官託疾不拜遨遊王公之門
以壽終文季工書翰有晉人筆意興陵萬機之
暇嘗購其遺墨學之有雪霽同韓公度登圓福
寺閣和李劼之詩今畧載于此積雪日出杲雪
飛梅已殘朋游要及時閣鄰有遐觀乘此蕪穢
平快覽天宇寬霽色混銀界曠望連江千山如
白毫相晃溢清揚端一氣轉浩渺萬里皆瀟漫
優哉賦梁苑想像排廣寒此下不可讀當俟善

本考之

無餘居士齋壁有沈傳師游道山岳麓詩石刻穆仲等和之因亦次韻

湘西勝景豈易論羣山騰闖萬馬奔鶴泉一麓騫鵬嚼
松風十里巖祇園當時侍御偶題寫筆力孰敢爭雄尊
東京少年妙詞藻南陽舊族齊陰樊天心月脇出奇語
使我展讀忘朝昏差差戈劍隱一敵落落旗鼓嚴千屯
無餘居士厲幽志細研六藝方專門凍齟嬌兒慣腸覓

啼飢瘦婦餘淚痕惟君德義允相愜每窮道妙角與根
他人勸酒驚逐魂二子頻酌勤空樽醉中詩成渺江海
風外幡影徒飛翻卷藏篋笥已戢戢風生襟袖何軒軒
嗟乎我亦有餘腐陋哉羊政囚華元

滕奉使茂實

八首

茂實字秀穎姑蘇人初名裸徽宗改賜焉以太
學正兼明堂司令與樞密路允迪翰林脩撰宋
彥通奉使割三鎮太原尋奉密詔據城不下國

相怒囚使人於雲中欽宗北遷秀穎謁見涕泣

請從行主者不之許放允迪彥通南歸茂實留

雁門與兄宗正承福

字伯壽

淮南發運使倚共居

久之家人至自汴梁秀穎往來并代之間布衣

終身臨終令黃幡裹尸而葬仍大刻九字云宗

使者東陽滕茂實墓士大夫哀其忠為之起墳

於雁門歲時致祭好問兒時先大夫教誦秀穎

臨終詩然亦僅能記末章數語而已庚子春自

山東還鄉里值鄉先生雁門李鍾秀提求秀穎

詩文鍾秀云喪亂以來家所藏書焚蕩都盡避

兵山中民家偶於破箱中得秀穎詩一編紙已

敗爛前序秀穎自作可辨者百餘字大畧言能

安於死生之分而不能忘感槩不平之氣又曰

蘇屬國牧羊海上而五言之作自此始予敢援

以為例後叙是筆吏林泉野老彥古年

彥古不著姓

七十八手錄三滕始末號東陽滕秀穎鳳山思

遠記者詩數百首可讀者什六七臨終一詩缺

三五字而已非筆吏比集則秀穎之事無以見於世子意先生名節凜然不媿古人其文字言語宜有神物護持雖埋沒之久而光明發見決有不可掩焉者因備述于此亦使彥古之名託

之而不腐云

荷字恐悞當作禡
見南申高濟叔碑

哀隆德守臣張確確浮休張舜民之弟嘗為烏延帥幕獨不廷謁童貫作詩弔之

睢陽萬古一張巡忠義傳家有世臣顏子伏膺當入室
潘郎望拜肯同塵圍城已限天猶晦仗劍臨危氣益振
飲子鄰邦盡曹李偷生端作九泉人

天寧節有感

節臨重十慶天寧古殿焚香祝帝齡身在北方金佛剎
眼看南極老人星千官花覆常陪燕萬里雲遙阻在廷
松栢滿山聊獻壽小臣孤操亦青青

汴梁故老云徽宗
本以五月五日生

以俗忌移之十月十日
故此詩有重十之句

雨後蔬盤可喜偶成

過雨盤蔬日日新從今休歎庾郎貧寒齏安取咄嗟辦
火食不憂生死隣野苧何施雖可鄙美芹欲獻去無因
干戈萬里風塵晦慙媿平生肉食人

五日

節物驚心動遠思薰風又見浴蘭時空尋好句書紈扇
無復佳人繫綵絲酒注菖蒲唯欲醉筒包菰黍不勝悲
明年此日當何處風裏孤蓬自不知

喜雨

早嘆雨霑渥豐穰都不疑
商羊應屢舞布穀強多知
龍見寧非數雲行自有時
當年班夏令曾得近丹墀

偶成

織雲卷盡見愁容
古木交陰一掃空
雪壓羣山曉來雨
葉侵缺甃幾畝風
欲歸未得人將老
屢送還來鬼亦窮
賴得子知佳傳在
整冠時讀慰飄蓬

立春

東皇布政物皆春山色禽聲便可人滿谷和風消積雪
半憲晴日動游塵宮花挿帽枝枝秀菜甲堆盤種種新
拘窘經時成上俗聊從一醉適天真

臨終詩

并序

某奉使亡狀不復反父母之邦猶當請從主行
以全臣節或怒而與之死幸以所仗節幡裹其
尸及有篆字九為刊之石埋於臺山之下不必
封樹蓋昔年大病夢遊清涼境界覺而失病所

在恐于此有緣如死窮微則乞骸骨歸悉如前
禱預作哀詞幾于不達方之淵明則不可亦庶
幾少遊之遺風也

蓋鹽老書生謬列王都官索米了無補從事敢辭難殊
隣復盟好仗節來榆關城守久不下川塗望湯湯儉輩
果不惜一往何當還牧羊困蘇武假道拘張騫流離念
窘束坐閱四序遷同來悉言歸我獨留塞垣形影自相
弔國破家亦殘呼天竟不聞痛甚傷肺肝相逢老兄弟

悼歎安得驪波瀾卷大厦一木難求安就不違我心渠
不汗我顏昔燕破齊王羣臣望風奔王蠲猶守節燕人
有甘言經首自絕脰感槩今昔聞未嘗食齊祿徒以世
為民況我祿數世一死何足論遠或死江海近或死朝
昏歛我不須衣裹尸以黃幡題作宋臣墓篆字當深刊
我室尚少女兒女皆童頑四海無置錐飄流倍悲酸誰
當給衣食使不厄饑寒歲時一酌我猶足慰我魂我魂
亦悠悠異鄉寄沉寃他時風雨夜草木號空山

通理何先生宏中 一首

宏中字定遠先世居雁門叔祖青出武弁任忻
州兵馬使因家焉祖行宣西遊遇仙不返行宣
之子子竒子霖政和中中武舉高科子竒秉義
郎武州宣寧尉子霖忠翊郎守豐州安豐砦皆
沒王事定遠子竒子也幼侗儀觀秀整雅以
竒節自許宣和末方賊擾江浙定遠以太學武
舉進士陳破賊三策徽宗褒諭謂非近日言事

者所可比已而破賊如定遠榮遂知名宣和元年集英殿試榮中第二調滑州韋城尉汴京被圍州郡多避走獨韋不下兵退統制武漢英奏辟欽宗御札召赴軍前以路塞不果因請兵真定宣撫司時副帥种師中兵已潰宣撫司檄定遠副漢英守銀冶路既而太原破西路無完城定遠等提兵竝山而東將赴援京師俄漢英戰死定遠收合散亡立山棚七十四所號令所及

千里而遠艱食數月人不敢相食詔以為武節
大夫河東河北兩路統制接應使是後國朝兵
日盛所守唯銀冶一城而已帥府募人生致定
遠天會五年二月糧盡被擒大帥昭刺憐其忠
解縛授以官定遠投牒于地曰我常以此物誘
人出死力若輩乃欲以此嚇我耶帥嘉其不降
屈又問欲還鄉否定遠謀南奔陽以願歸為言
會監送使臣有先與定遠相攻劫者愬之囚西



京府君廟二年帥一日召之授以官又不拜使
之克軍亦不從取家屬填城黃龍府益偃蹇不
行帥怒褫衣欲斬之定遠忻然就戮曰得死所
矣擁之行已數十步帥終不忍召還問爾授官
不願充軍又不行填城又不行斬又不懼畢竟
欲何如定遠徐曰生死在公奚問為帥怒解繫
之西京獄得州人保任者數十族乃放歸請為
黃冠時神霄宮廢道士舊以徽宗為東華君將

毀其像定遠為起紫微殿遷像事之年六十三
正隆四年病歿自號通理先生所著成真通理
二集藏于家州將傳慎微幾先贈詩云故人何
定遠造物不虛生骨骼稜稜瘦詩篇字字清世
皆尊道義我獨見忠誠尊酒分攜後何時益復
傾其餘與朱少章輩唱酬甚多皆為所推重載
之墓碣之陰

述懷

馬革盛尸每恨遲西山餓路更何辭姓名不到中興歷
付與皇天后土知

醉軒姚先生孝錫

三十二首

孝錫字仲純豐縣人政和四年登科調代州兵
曹國朝兵入雁門州將議以城降官屬恇怯投
死無所仲純投床大斲畧不以為意帥府就注
五臺簿未幾移疾去因家五臺善治生亭榭場
圃富於遊觀賓客日盈其門州境歲飢出家所

藏粟萬石賑貧乏多所全濟鄉人德之中年之
後以家事付諸子放浪山水間詩酒自娛醉軒
其自號也資稟簡重喜怒不形于色棄官時年
二十九至八十三乃終名士大夫為詩以弔者
數十人先生長于尺牘所著雞肋集喪亂以來
止存律詩五卷而已今畧載於此次冠鄉韻云
節物後先南北異人情冷暖古今同次趙獻之
韻云紅纈退風花著子綠鍼浮水稻抽秧溪壑

早春云久客交情諳冷暖衰年病骨識陰晴春

日和德充云烟染綠絲迷別浦雨催紅糝綴長

條新詩云愁邊日晷偏疑短夢裏江山未當歸

盤無兼味慙留客夢厭多歧不到鄉賦雪云酒

敵餘威翻索莫詩含幽思倍清新雨云岸漲魚

吹沫山空石轉雷雪云舞風初學絮帶雨不成

花峯山寺云谷虛繁地籟境寂散天香雲生古

木千章秀山抱晴川一掌平懷士會云詩忙疎

酒醞俸薄減厨煙感懷云玄晏算年常抱病子
山終日苦思歸古詩尤有高趣恨不復見之矣

挽詞今載于此掌飲令胥持國云山東夫子老
河東誰與先生臭味同早歲遽辭名宦裏百年
常樂聖賢中醉軒風月千秋恨蝸室樽罍一夢
空白玉樓成人不見空餘鄉淚託東風 司經
劉迎云百年陸陸變蒼忙晚向山林得老蒼孤
幹鬱生陳柏樹故基踈立晉靈光謀生有道田
園樂閱世無心壽命長何日車聲過通德拜公
一炷影前香 高平李仲畧云早歲才猷著崎
嶇涉世艱非嫌食周粟甘學抱吳闌高義追東
漢移文謝北山孤風激貪懦凜凜莫容攀 平
水毛鹿云蓋世清芬五十年直疑湖海水雲仙
不矜江夏無雙譽便造南華第一篇松菊就荒

堪笑晚尊豔託興果誰賢佳城鬱鬱高名在應
與臺山萬古傳西京都轉運使丹元子田彥
臯云琳琅風月三千首游戲塵凡八十秋三徑
尚存元亮菊五湖空負子皮舟王元老云夫
子人之傑魁然道最純鄉閭連沛邑族系出虞
賓清節冰壺瑩孤標玉樹新妙齡探桂窟雅志
傲蒲輪事業傳衣鉢風流表縉紳斗南惟此老
月旦復誰人忍死哭亡社偷安笑具臣斯文雖
未喪吾道竟難伸彭澤不書宋東陵無負秦直
從強健日收得自由身把臂言猶在回頭迹已
陳發書占賈鵬絕筆感商麟去矣騎箕尾嗟哉
厄已辰終天從此別窮壤向誰親墮搏逢王果
留燈待沈彬彭殤俱逝水丘跖共荒榛書帶緣
新壠笛聲起舊鄰絕絃雙隴淚挂劍一傷神冢
樹悲長夜山花作好春龜趺平木杪誰為寫光
塵承旨党世傑云望西山以馳弔于其下維

德人抱明月以螭盤子寧終屈而不伸天昏廓
以四闔子羣飛紛其工齋將搏擊以竝征子借
衝風之落羽蘭為佩子桂為惟誰招余者子余
從與歸青雲豈難振跡子顧捷結之不素元豹
自媚其文子亦何嫌於隱霧詩書與友子琴尊
與游適意自安子樂閒自休出吾餘以研桑子
猶足以比素封之侯惟清閒為祕福子非有力
能兼取雖神仙猶可畏子曾莫樂于下土數與
數相乘除子常此奪而彼與陋巖栖之下聚子
心實往而跡藏出非微而處非隱子吾獨蹈古
人之所常隨時委順以
終老子噫先生為不亡

睡起

生涯甘分寄畊桑山色圍門水遶墻困病久懲耽酒癖

愛閒猶有和詩忙
簷水滴春猶冷
野馬浮川日漸長
舊事老年多記憶
故園歸夢正悠颺

柳溪別墅

安車隨意飽甘肥
晚食徐行理亦齊
山市日高人未集
柴門客至鳥先啼
溪橋散望攜筇度
野寺牽吟信筆題
容膝易安聊自適
甕天閒看舞醯雞

歲晚懷二弟

少易成歡老易傷
壯遊垂白未還鄉
煙塵無復音書到

魂夢猶疲道路長，爆竹又驚新薦歲。屠蘇空憶舊傳觴，
年年此日遙相憶。鴻雁何時續斷行。

睡起

睡起日侵牖，開軒遙見山。曉風吹臘盡，芳草惹春還。
煙暖鶯遷谷，雲低雁渡關。哀年人事減，遇酒得開顏。

次李平子登臺有感韻

落日孤雲帶遠岡，戍樓烟瘴舊邊場。疲民卒歲方懷土，
遠客憑高自憶鄉。漢使一朝廷，四皓秦詩千古弔。三良

行藏此意無人解聊借青山送酒觴

九日題峰山

不須歌吹上叢臺千里晴川入座來
世事難憑休挂口
生涯見在且銜盃無情趁暖花
先老有信迎寒雁已迴
遙想故園親種菊霜枝露蘂向誰開

次韻王無競見寄

客懷重倚仲宣樓白草黃雲塞上秋
山色不隨塵世改
水聲還抱故城流
隙中畏景那堪玩鏡裏哀顏祇自羞

多愧詩人苦相憶遠傳佳句弔清愁

閒居

無客訪哀殘柴門盡日關耽書真是癖惜酒近成慳苔
徑行搜句茅檐卧看山却嫌明鏡裏偏照鬢毛斑

和成冠卿見寄

別恨頻添鬢雪深百年懷抱鬱沈沈標名不挂金銀榜
涉世空堅鐵石心俗物何勞供一醉殘僧正欲伴孤吟
朱絃三弄虛簷寂唯有清風是賞音

次韻秋興

老畏年光速，愁添旅夢多。
西風著梧竹，歸思入煙波。
夜永憑詩遣，顏衰得酒和。
故溪千樹柳，誰復曬漁蓑。

感白髮

彈缺憑誰聽，客歌震雷那。
復化魚梭梳，頭白雪驚新。
有障眼玄花，比舊多鄉問。
阻兵猶斷絕，羈懷憑酒暫。
消磨不須更問，今朝客門外，元無雀可羅。

曉霽

一夜雲峯卷迅雷殘紅狼籍點蒼苔鶯聲豈解留春住
燕語虛勞喚夢迴愁寂頓疑詩思減哀殘偏感歲華催
柳溪魚鳥應相識乘興無嫌日日來

重九偶成

天邊今日又重陽隴樹紅飛雁信霜且插茱萸慰衰鬢
莫將詩句撓迴腸歌勤皓齒人俱醉舞戀晴暉蝶也忙
來日預期扶宿酒未應籬菊減秋香

溪橋早春

輕黃未染柳梢勻連日溪風卷塞塵乍暖乍寒花信晚
相呼相應鳥聲頻少勤謾挾經綸榮老懶空餘病患身
追憶故園桃李樹年年紅紫為誰新

東軒琴示兒子沂

古人無復見但有東軒琴一鼓高山操因窺古人心正
聲久沈埋俚耳喧哇淫正可自怡悅不須求賞音

花前獨酌二絕句

老將花酒作知音起就花前酒自斟莫便興來先酌酌

却妨真賞廢搜吟

又

移得名花手自栽
花知不為老人開
興來誰是尊前客
唯有提壺送酒盃

題柳溪別墅

雨霽風和不動塵
柳邊攜酒賞晴春
頻來溪鳥渾相識
渡水穿花不避人

芍藥

綠萼披風瘦紅苞浥露肥只愁春夢斷化作彩雲飛

次韻李相公偶成

簾鳥呼歸夢竹風追夕涼感時空有淚却老分無方流
水依山白孤雲帶日黃無人共尊酒散髮卧藜床

村居偶成

靜愛柴門野興幽杖藜徐步到岩丘深林有獸鳥先噪
廢圃無人泉自流土瘠稅租隨力辦年豐禾黍過時收
客來不慮無供給白酒黃雞亦易求

用峯山舊韻二首

信步西風寺窮幽未覺賒
松根纏石瘦雲磴出岩斜
思爽餘三唱詩成自一家
空餘幾兩屐不踏渡溪槎

又

春水上堤沙春晴散望賒
衰年花近眼久客夢還家
暎日孤鴻沒迎風雙燕斜
平生江海意早晚送浮槎

題佛光寺

臧穀雖殊竟兩亡
倚闌終日念行藏
已忻境寂洗塵慮

更覺心清聞妙香
孤鳥帶烟來遠樹
斷雲收雨下斜陽
人間未卜蝸牛舍
遠目橫秋益自傷

芭蕉

鳳翅搖寒碧
虛庭暑不侵
何因有恨事
常抱未舒心

蜀葵

傾心知向日
布葉解承陰
空側黃金盞
誰人與對斟

次韻公才對菊見懷

髮蓬新感二毛侵
尚阻清尊對菊斟
久擬芝蘭同臭味

莫疑魚鳥自高深
食貧豈復甘秦炙
客病空懷奏楚音
挂席無由上牛斗
漫憑流水送歸心

寄田朝散善輔

粉署標名舊山城
識面新青雲
摧勁翮空谷滯
幽人世路謀身拙
心田育德醇
久要知可卜
傾蓋已情親

春日書懷

雲散交情薄
碁翻世態新
山容猶帶臘
鳥語已回春
節物驚心遽
丘園入夢頻
東風如解語
端笑未歸人

春日溪橋

留戀春光慰病顏，無情風雨卷春還。
陰陰密綠籠溪暗，細細疎紅點徑斑。
老去益憐詩思澀，懽來聊破酒腸慳。
不嫌門外無車轍，得遂哀慵一味閒。

登樓有懷

老愧凭闌目力昏，百年懷抱向誰論。
晴空雁起雲邊塞，夕照人歸郭外村。
因記昔遊驚迅晷，暫將離恨付清尊。
誰人肯似邊居士，遠駕朱輪過雀門。

題滕奉使祠

本期蘇鄭共揚鑣不意芝蘭失後凋遺老祇今猶涕洟
後生無復識風標西陲雁度霜前塞潯水樵爭日暮橋
追想生平英偉魄凌雲一笑豈能招

朱奉使弁

三十九首

弁字少章宋吉州團練使天會六年以通問見
留命以官託目疾固辭猝然以錐刺之而不為
瞬用是得歸凡居雲朔二十年自號觀如居士

有曲洧風月堂詩話行於世紹興十二年皇子
生大赦宋使洪皎張邵朱弁南歸

蘇子翼送黃精酒

仙經何物堪却老較功無如太陽草龍銜雞銜名雖異
兔公羊公事可考蘇君真是神仙裔橘井陰功貫穹昊
雲笈書成數萬言銀闕珠宮用心早獨知此物有奇効
福地名山為儲寶不憚林泉新劬掘斥去杵臼謝篩擣
況從高士論麴糜更課公田收秣稻一朝靈液浮菟盞

三冬浩氣生襟抱且欣軟飽得澆腸漫說逆流上補腦
眼碧那憂散黑花髮白故應還翠葆賈傅只嫌松醜陋
劉隨敢誇桑落好直須五斗論解醒寧待三杯乃通道
誰知萬里落旄人亦許匏尊自傾倒為君喚迴雪窖春
八載羈愁供一掃曼倩宜分此日桃安期莫詫他年棗
何煩更採石斛花已覺容顏不枯槁根連石室喜入夢
句擬桐溪媿摘藻平生我亦愛書札朱髓綠腸勤探討
幸君汲引成此志鶴駕駸駸望仙島吞腥啄腐非夙心

歲晚茲言良可保

初春以蔓菁作齏因憶往年避難大隗山采蘋澗
中為齏齏成汁為粉紅色而香美特異乃信鄭
人所言為不誣矣今食新齏因成長韻

藏蔬飽三冬媚盤無霍靡陳齏解束縛冰雹散刀几春
畦蕪菁苗入眼漸可喜青黃含風露採摘從此始持歸
作新齏一飽競鮮美芬香溢肺肝甘脆響牙盞攔腹幽
窻下芻豢詎能比憶昔避難初竄身重崑裏雲煙昏具

茨老稚且棲止燕兵大搜索焚蕩石牛底脫命獨虎山
野哭紛四起莫投山前店茅棟例燒毀潛伏窟室中衣
敝不蓋體妻孥坐相對生意薄於紙晨朝行澗中采芹
澗邊洗鄭人誇此蘘他菜非所擬氤氳投瓦盜觸鼻似
蘭芷一杯紅粉羹析醞勝仙醴乃知野人獻涼薄未宜
鄙今來滯殊鄉白首家萬里猶能對葷羶咀嚙出宮徵
回思十年夢爭奪殊未已飽食但謀身吾願良有此
北人以松皮為菜予初不知味虞侍郎分餉一小

把因飯素授厨人與園蔬雜進珍美可喜因作
一詩

吾老似出家晚悟媿根鈍滋旨却羶葷禪悅要親近偉
哉十八公茲道亦精進舍身奉刀几割體絕嗔恨鱗皴
老龍皮鳴盞溢芳潤流膏為伏龜千歲未須問便堪奴
筍蕨詎肯友芝菌跣趺得一飽萬事皆可擯侍郎文懿
後落落衆推俊澹然世味薄內典得所信香厨留淨供
頻食不言頓晏然默不語草木雷音震得法於此公骨

髓傳心印應憐持節人餉此為問訊欲將無上味為我
洗塵空食之不敢餘感激在方寸

予以年事漸高氣海不能發生暖冷旅中又無藥
物遂用火攻之策灼艾凡二百壯吟呻之際得
詩二十韻

不作漳濱卧年侵血氣衰據鞍思少壯攬鏡歎清羸有
病方求艾無營莫問著心知出下榮理勝遇中醫陽燧
神逾速銅山術盡施論功鄙炮製取穴辨毫釐大帝恩

光異炎官績用奇書螢比差似珠蟻迫方知忖物嗟炮
鼈觀形笑灼龜燿微初炙手氣烈漸鑽皮閉目書徒展
支頭枕屢移發狂還自哂賈勇僅能支宋鷁追風日吳
牛喘月時忠言勞緩頰善謔為開眉服氣工夫遠燒丹
歲月遲衛生防後患伐性釋前疑展轉那成夢呻吟且
當詩因心念民瘼出位歎身卑欲已七年病當從百世
師保身將保國未可廢歲規

元夕有感

朔雪餘千里東風徧九州
關河中土異燈火上元愁
綠蟻嘗新釀青貂戀故裘
紫姑無用卜世事正悠悠

憶鍾離濬

浚都同聚讀書螢楚岸春風憶送行
三十年前初識面
四千里外更關情出疆我亦徒勞爾
入仕君今何似生
旅雁相逢須一問要從郵上得新聲

炕寢三十韻

風土南北殊習尚非一躅出鄉雖仗節
入國暫同俗淹

留歲再殘朔雪滿崖谷禦冬貂裘敝一坑且踰伏西山
石為薪黝色驚射目方熾絕可邇將盡還自續飛飛湧
玄雲皦皦積紅玉稍疑雷出地又似風薄木誰容鼠棲
冰信是龍銜燭陽曦助喘息未害搖空腹惠氣生袴襦
仍工展拳足豈惟脫膚鱗兼復平體粟負暄那用詫執
熱定思沃收功在歲寒較德比時燠雖餘炙手焰寧有
爛額酷矧當凝冱晨炎帝獨回轂玄冥真退聽祝融端
可錄嗟予亦何者萬里歌黃鵠偃仰對窻扉妍暖謝衾

禱壯懷羞竈媚晚悟笑突曲因思隨指人暴露苦黻瘵
頻年未解甲蹈比鋒刃毒遙知革輅中盱食安豆粥陪
臣將命來意懇誠亦篤有奇不能吐何術止南牧君心
想更切臣罪何由贖此身雖自溫此志轉煩促論武貴
止戈天必從人欲安得四海春永作蒼生福聊擬少陵
翁秋風賦茅屋

秋泉次韻

新醅瀟瀟溢瓶盆漱石秋泉帶雨渾翡翠杯深雲液凝

卷十
鷓鴣杓滿月波翻照人光入尊壘瑩流齒香隨語笑噴
已拚扶頭日三丈朝醒未解任昏昏

夜雨枕上

浙浙風聲止淒淒雨氣涼愁工縈客思夢故遶江鄉書
疏親朋少干戈歲月長平城弭節地可復見秋霜

客懷

兵氣常時見客懷何日開形骸病自瘦鬢髮老相催已
負秦庭哭終期漢節回風雷識我意一雨洗氛埃

歲序

歲序忽將晏節旒嗟未還低雲添衆木寒雨失羣山喪
亂關詩思謳謠發病顏夢魂識舊隱時到碧溪灣

白髮

白髮使車前煙波思渺然霜清穫稻日風急授衣天客
館但愁坐釣舟誰醉眠乘槎會有便真到斗牛邊

有感

容貌與年改鬢毛隨意斑雁邊雲度塞鳥外日銜山仗

節功奚在捐軀志未閒不知垂老眼何日覩龍顏

劉善長出示李伯時畫馬圖

俯首舉尾拳一蹄掣韁欲喫驕不嘶奚官聳肩兩足垂
意貌自與造父齊雞目麟鬣鳳呈臆玉山禾遠未容食
籟雲追電有餘地置之畫圖人豈識精神權竒孰可班
當在白兔青龍間君知此馬從何來龍眠胸中十二閑

謝崔致君餉天花

三年北饌飽羶葷佳蔬頗憶南州味地菜方為九夏珍

天花忽從五臺至崔侯胸中散千卷金甌名相傳雲裔
愛山亦如謝康樂得此攜歸豈容易應憐使館久寂寥
分餉明明見深意堆盤初見瑤草瘦鳴蓋稍覺瓊枝脆
樹雞濕爛慚扣門桑蛾青黃漫趨市赤城菌子立萬釘
今日因君不知貴乖龍耳僅免一割沙門業已通三世
偃戈息民未有術雖復加餐祇增媿雲山去此縱不遠
口腹何容更相累報君此詩永為好捧腹一笑萬事置

戰伐

戰伐何年定悲愁是處同黃雲紫晚塞白露下秋空魚
躍深波月烏啼落葉風誰知渡江夢一夜繞行宮

龍福寺煮東坡羹戲作

山寺解塵鞅溪邊有微行手摘諸葛菜自煮東坡羹雖
無錦繡腸亦飽風露清鈎簾坐捫腹落日千峯明

丙申中秋不見月

中秋萬里月何處駕冰輪底事隔年會不憐今夕人兔
疑停杵白蟾豈避風塵默識嫦娥意承平賞更新

十七夜對月

病骨怯風露，愁懷厭甲兵。人居絕域久，月向北宵明。輪

仄初經漢，光分半隱城。遲遲不肯下，應識異鄉情。

人謂少章

此詩似微升古塞外而末章尤為淒絕必有能辨之者

睡軒為趙光道作

深炷爐香，睡息勻蕭然。一覺得天真，生涯聊示人間世。
緣境都忘藥，畏身窺牖屢。來從汝喚叩門空，去任渠嗔。
更須滿壁圖雲水，卧想江湖渺莽春。

南齋即事

頻年行役夢庭闈
陟岵常嗟脚力疲
每訴酒巡嫌客惡
力營官事笑兒癡
雲山幸不持錢買
花竹何妨帶雨移
此味貴人元未識
恐緣詩好被渠知

餞和父之并州

有北何堪說如南
未是歸并門子徑
往漢節我方鞿筆
硯論心久干戈會
面稀新程相憶處
路入巔雲微

獨坐

草凍慵抽碧桃癡懶暈紅黃雲猶漢野紫塞湯春風使
節空留滯侯圭未會同堦除雪不埽獨立數歸鴻

寒食

絕域年華久衰顏淚點新每逢寒食節頻夢故鄉春草
綠唯供恨花紅只笑人南軒定何日無地不風塵

上巳

行行春向暮猶未見花枝晦朔中原隔風煙上巳疑常
令漢節在莫作楚囚悲早晚鸞旗發吾歸敢恨遲

送春

風煙節物眼中稀三月人猶戀褚衣
結就客愁雲片段喚回鄉夢雨霏微
小桃山下花初見弱柳沙頭絮未飛
把酒送春無別語羨君纔到便成歸

天問絕句

穴邊酣戰君臣蟻波上羣嬉婢妾魚
苦樂不同同一字問天此理竟何如

客夜

城月四更上窻風一室幽纖雲縈雁塞重霧逼貂裘兵
革何年息乾坤此夜愁殊鄉兩行淚騷屑洒清秋

攄抱

客滯殊方久山圍絕塞深秋風入橫笛夜月倚沾襟造
膝他時語捐軀此日心飛霜滿明鏡髮短不勝簪

重九

九日今何地寒深紫塞霜敢嫌蘆酒濁且對菊花嘗歲
月雙蓬鬢乾坤百戰場賜莫知未舉夢自識鴛鴦行

次韻劉太師苦吟之什

長城五字屹逶迤可笑偏師敢出奇
句補推敲未安處韻更瘳絮益難
時癡迷竟作禽填海辛苦真成蟻度絲
却羨彌明攻具速劉侯湯說也能詩

善長命作歲除日立春

土牛已著勸農鞭韋索仍專捕鬼權
且喜春盤兼守歲莫嗟臘酒易經年
東風漸入江梅夢朔雪猶迷塞柳天
元會明朝定何處羈臣揮淚節旄前

次韻子文秋興

逸興常時有逢秋一倍多
山長含楚雨天遠接吳波
尋壑同元亮浮家伴志和
釣竿行入手還著向來蓑

冬雨

冬雨不成雪北風寒未深山
藏千疊秀雲結四垂陰迴
洒陵朝閣聲殘入夜衾
端能洗兵甲足慰此時新

寒食感懷次韻吳英叔

疾風甚雨老難禁
嶺外無錫誰解吟
雙鬢客塵諳世變

兩眉鄉思儘愁侵
榆錢何處迎新火
杏粥頻年繫此心
落日高城竟易斷
天臨牛斗五湖深

春陰

關河迢遞繞黃沙
慘慘陰風塞柳斜
花帶露寒無戲蝶
草連雲暗有藏鴉
詩窮莫寫愁如海
酒薄難將夢到家
絕域東風竟何事
祇應催我鬢邊華

寒食

清明六到客愁邊
雙鬢星星只自憐
兵氣尚纏巢鳳閣

節尾已落牧羊天紙錢灰入松楸夢錫粥香隨榆柳烟
北向雁來寒霧隔音書不比上林傳

李任道編錄濟陽公文章與僕鄙製合為一集且
以雲館二星名之僕何人也乃使與公抗衡獨不
慮公是非者紛紜於異日乎因作詩題於集後俾
知我心者不吾過也庚申六月丙辰江東朱升書

絕域山川飽所經客蓬歲晚任飄零詞源未得窺三峽
使節何容比二星蘿蔦施松慙弱質蒹葭倚玉怪殊形

齊名李杜吾安敢千載公言有汗青

濟陽公謂宇文叔通叔通受官而少

章以死自守恥用叔通見此故此詩以不敢齊名自託至於書年為庚申與稱江東朱弁者益亦有深意云

秋夜

秋夜雖漸永未抵客愁長秋月雖已圓不照寸心方將
心貯此愁真作萬斛量為月憐此夜誰共千里光空令
還家夢欲越征鴻翔

附見

蘧然子趙滋 一首

滋字濟甫本出馮翊其祖貞元間來為南京漕
司戶籍判官卒官汴妻子不能歸遂為汴人濟
甫少日出閭里間其曉音律善談笑得之宣政
故家遺俗者為多及長厭於游蕩乃更折節取
古人書讀之學書學畫學詩學論文立志既堅
力到便有所得為人強記默識不遺微隱唐以
來名人詩文往往成誦如目前考論文義解析
脈絡殆若夙昔在文字間者畫入能品詩學亦

有功如黃石廟等作今代兼筆者或亦未可輕
議閒閒趙公書法為今代第一手學者多做之
但得其形似而已濟甫筆勢飛動頗得公不傳
之妙宗室胙公文采風流照映一時而濟甫以
布衣從之游商畧法書名畫胙公亦以真賞稱
焉隆德太一故宮樓觀臺沼門戶道路花木水
石悉能歷數之聽者恍然如親到其處至於宋
名賢所第宅坊曲與其家行輩羣從孫息姻婭

排比前後雖生長鄰里不加詳也嘗過長清一
禪寺與僧談僧言五派傳授圖大不易作濟甫
笑曰易與耳因索筆作圖坐中他日以舊本證
之毫不差也丁酉歲歿於東平時年五十九

黃石廟

狂豪擊車代無人神石一砥志乃信吹噓風雲遮楚秦
炎精熾然四百春一編尚恪續後塵江山有待終此身
望望久愁橫目民朝陽淒淒霜未休江燕竟來江北游

山回鼎移海橫流天風何時清九州草泥自古踰王侯
神棄不卹誰當羞割牲醜酒空千秋

先大夫詩 四十三首

鄉先生權叅知政事代郡楊公叔玉謨先人墓
銘今畧載於此先生姓元氏字德明秀容人唐
禮部侍郎次山之後自幼讀書世俗鄙事終其
身不挂口為人誠實樂易洞見肺腑雖童子以
言欺之亦以為誠然也先大夫歿遺產無幾先

生布衣蔬食處之自若家人不敢以生理累之
僮奴有竊拾東家之棗者立命還之貧人負債
則往往令折券以貸之也累舉不第放浪山水
間未嘗一日不飲酒賦詩春秋四十有八終于
家先生作詩不事彫飾清美圓熟無山林枯槁
之氣居東山福田精舍首尾十五年東崑其自
號也有集三卷藏于家銘曰貪夫徇財智士死
名宇宙古今萬轍混并我機弗張我戶弗扃天

宇泰然物莫敢撓飲芳食菲岩岫杳冥玉佩瓊
琚御風泠泠魯山之醇次山之清閱世幾傳猶
有典刑邈哉先生明昌承安間科舉之學盛大
夫士非賦不談人知先生有聲場屋間其以詩
文為業則不知也先人捐館後十年好問避兵
南渡游道日廣世始知有元東岩之詩楊尚書
之美云彼美元夫子學道知觀濶孔孟澤有餘
曾顏膏未殘林觀察顯卿云文章變古名新體

孝弟傳家守舊規雷內翰希顏云詩句妙九州
孝友化一川王石司仲澤云讀書楓樹林曳杖
白石灣至今文彩餘虎子仍斑斑李長源云衣
冠巢許自高雅岩壑夔龍非棄捐餘人不能悉
記家集亂離已來凡三失之今所存者特吾益
之兄及門生輩所記憶者耳小子不肖暗於事
機不能高蹈遠引戀嫫升斗微俸萬一以取縶
維之禍殘息奄奄朝夕待盡誠懼微言將絕謹

以古律詩四十首附之中州集之癸冊庶幾來者知百餘年間作詩如先人而人或未之見其餘抱一槩之操泯泯默默終老而無聞者豈勝計哉是又可為歎也

桃源行

山中三月山桃開紅霞爛熳無邊涯

音崖

山家藏春藏不

得落花流水人間來憶昔攜家竄岩谷秦人半向長城
哭回頭塵土失咸陽繒弋徒勞羨鴻鵠冬裘夏葛存大

朴小國寡民皆樂俗晝永垣籬雞犬閒春晴門巷桑榆
綠漁郎偶到本無心仙境何緣得重尋今日武陵圖上
看唯見雲林深復深

送德温同舍赴簾試

太常侍祠水蒼珮內相夜下金蓮燭皇家結網未曾疎
亦有佳人在空谷一從唐賦變遼律仰視折楊猶雅曲
雲臺勲業一青衫被髮操戈踵相屬筋疲力涸僅乃得
墨水一升凡幾辱英雄俛首入彀中舉世悉然非子獨

子家口衆親又老歲月甘須寸祿薦書聞說過南宮
冷暖人情到僮僕我初與子偕計吏人後人前隨碌碌
不慙齊客售鼓瑟頗為荆人悲獻玉一詩今日送君行
萬里秋風看鴻鵠功名前路知不免雞黍後期良未卜
錦標無用吃龍頭帛書且當傳雁足

雨後

十日山中雨今朝見夕陽乾坤覺清曠草棘有輝光
竹影搖殘滴松聲送晚涼南窗聊自適無用說羲皇

覽鏡

四十宜未老年年添鬢絲
直教隨蝶去也是挂冠時
臺閣多新賦山林有逸詩
悠然一尊酒滿酌不須辭

室人生朝

新酒清渾共糟床
洗盞嘗平時唯欲醉
此日重難忘容服
慙王霸山林得
蓋光白頭翁與媪
萬事聽諸郎

太原古城惠明寺墻秋望

西山萬古壯陪京
一日汾流入廢城
浩浩市聲爭曉集

昉昉原隰但秋畊晉公老去詩仍在

晉公晉陽官舍春日詩云白頭官舍

裏今日又春風

越石亡來恨未平千尺浮圖算烟底瓦盆濁酒

為誰傾

薄遊同郝漕子玉賦

全晉山河百戰場登臨歷歷見興亡夷居猶雜尤堪歎
霸氣沈雄亦未量石菴烟霞詩秀潤駘祠風月酒淋浪
書生不是功名具慚愧山翁問葛疆

山中秋夕

黃卷存餘習青燈共晚涼
只知書味永不覺鬢絲長
老檜千年物幽蘭一國香
平生陶靖節此夕邈相望

寄宗人彥達

交城人

杯酒無緣接舊歡
空將書尺問平安
要君知我詩成處
落日西風正倚闌

榴華

山茶赤黃桃絳白
戎葵米囊不入格
庭中忽見安石榴
歎息花中有真色
生紅一撮掌中看
模寫雖工更覺難

詩到黃州隔千里畫家辛苦費鉛丹

過鳳皇山

在雁門

鳳皇聞說似天壇北去南來馬上看想得松聲滿崑谷
秋風無際海波寒

瓶形嶺早發

在繁時界

海雲蕭瑟雪花乾人在羊腸百八盤間客不知名利苦
見時應作畫中看

寒食再遊福田寺

春山寂寂掩禪扉
複嶺盤盤入翠微
布韞青鞵供勝踐
粥魚齋鼓薦玄機
日烘幽徑綠烟煖
風定曉枝紅雨稀
曾是西堂讀書客
不應啼鳥也催歸

家園假山

八尺飛來峯蒼然
立於獨細看甲乙
字疑是平泉族
山非一草石見石
山亦足便恐東岫
雲來我簷下宿
今朝鑿盆池明朝
種松菊自笑住山
人何時返巖谷

同侯子晉賦雁

沈沈江浦雲浩浩朔漠雪微生
幾寒暑翅老飛欲折樓中見
新過夕照送明滅歌枕數聲來
疎窻耿殘月悲鳴或天性南北
隨所愜誰念孤旅人年年為愁絕

寒林圖為侯子晉賦

川光茫茫風景暮一雪無情天地素
長安閉門千萬家亦有行人踏長路
新豐煙火灞橋水畫史工作荒寒趣
雪中故事知幾何偏識詩翁忍寒處
君不見淮西城下鷺鸞鳴官軍夜斫吳家營
只如堯家麤俗亦不惡銀燭

金荷天未明拈出新詩三十韻塞驢席帽可憐生

雪詩
三十

韻見
坡集

贈答彥文相過之什

程太
原人

剝啄誰叩門開門得吾友握手一大笑慰我離羣久之
子富才具事業可力取瞻望青松姿哀遲愧蒲柳金閨
滿鴛鴦什伯自為偶寂寞林野人過從但鄰叟盤飧無
蕪味筍蕨才適口窮達俱偶然相逢且杯酒

枕上

往時見白髮談笑輕歲月誰謂明鏡裏蕭蕭不勝鬪山
林蹉跎久世慮初未絕觸物重興懷忽忽不自愜遭逢
有奇耦才用隨巧拙如何杜陵叟自比稷與契茫茫拊
塵編何時卒吾業

秋算王氏園亭

細徑雲林底危亭澗水湄秋先殞黃葉寒未老紅葵嚼
句幽禽答尋花晚蝶隨無人共幽興思與野僧期

六言

北闕三臺五省東山萬壑千巖琴書中有真味風月外
無多談

山園梨葉有青紅相半者戲作一詩

霜輕霜重偶然中一葉雖殊萬葉同不信世間閒草木
解隨兒女作青紅

詩

少有吟詩癖吟來欲白頭科名不肯換家事幾曾憂舍
咀將誰語研摩若自讐百年閒伎倆直到死時休

尊酒

土灰論遠計木石笑浮生但有一尊酒何須千載名
憶山中二絕句

東寺留連飲張園爛熳遊兒童望歸路一日幾登樓

又

秋色山中好山翁醉不迴不知籬下菊霜後幾叢開
山中雨後

遠屋湍聲轉臨崖老樹摧雷轟一雨去雲擘兩山開

遣興

張翰一杯酒林逋千首詩
性惟便自適材敢論時
狡兔從三窟鷓鴣分一枝
青山有佳色只似往年時

發冀州留別恩禪師

詩拙非同社情親本故鄉
共知成遠別且復暫相將
池古蓮花淨窻深檜葉香
何時重攜酒來宿贊公房

貴公子詠

高堂紅燭鼓聲齊
舞遍纖腰月未西
一曲纏頭一雙錦

驂騑空自惜障泥

蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹青變
畫史區區可得工

謝張使君夢弼餽春肉

牙豬肋厚一尺玉鹽花入深蒸脫骨韭芽蓼甲春滿盤
走送茅齋慰幽獨山人食貧才一粥幾被艾生嘲首肯
食前方丈非素懷頗憶懸貍繞高屋呼來鄰叟共一飽

為說使君方繼肉饑民待哺今幾家無榮贖君慙此腹
區區一肉見歌詠說食書生良未足却愁今夕夢寐間
有物踏破園蔬綠

仙雞詩

并序

繁時義興鎮酒家韓氏子畜一雞以善鬪雄其
鄉一日敵家以藥飼雞使不知痛求與韓雞對
韓雞鬪久果被傷口下頷不收垂死矣一賣藥
道人過其門曰我能活此韓欣然使療之里中

諸兒隨看者一二十輩皆使向壁立道人以雞
置籠中探手良久若摩拊然者已而取瓢水喫
之置瓢籠上即出門兒曹恠其久不還竊視之
雞喙已復生矣道人布袍草冠腋下懸青囊落
魄嗜酒夜宿寺閣上韓氏子與里中人奔走求
之并所卧草薦不在矣是時明昌七年仲規弟
為此鎮酒官予亦在焉作仙雞詩以記之

老雄健鬪夸壇場韓郎抱歸神色傷豈知黠兒出微倖

毒手一發不得妨
毳衣散灑尚可養
利嘴一哆何由張
青囊道人何許來
自言救藥吾有方
垂髯喫水濯殘血
半喙隨手生新黃
筠籠半開聞膈膊
草冠已往徒驚忙
神仙世有寧虛荒
惜哉詭激不可量
世人鷲勇天且劓
況於物也資強梁
敷榮枯枿變金石
未若與世鍼膏肓
何須變化示狡獪
知君辦作淮南王
蓬萊東望雲茫茫
愛而不見心為狂
刀圭不願換凡骨
且欲共醉無何鄉

燈下讀林和靖詩

落葉落復落清霜今幾番
疎燈照茅屋山月入顏垣
老愛寒花淡幽嫌宿鳥喧
卷中林處士相對兩忘言

觀西巖張永淳畫雁

慘淡經營下筆難畫成不似卷中看
知君連夜江湖夢折葦蕭蕭沙水寒

從趙敷道覓石榴

仙人囊中五色露得種昔與蒲桃俱
猩猩染花開五月已覺秋實懸庭除
張園一酸蓋欲裂君家兩株蜜不如

竹馬兒童馱梨栗綠囊聊為剝紅珠

雪行

五更驢背滿靴霜殘雪離離草樹荒身在景中無句寫
錯教人比孟襄陽

龍眠畫馬

驪黃求馬世皆然滅沒存亡自一天當日鹽車人不識
只今空向畫中傳

歲暮

藪藪霜力勁沈沈山氣冥北風半夜起吹動一天星

送張冀州致政還都

狀元行簡之父

一札恩書下紫宸東門祖道畫圖新路人也解賢疏傅
河內猶思借寇恂父子文章千載事田園松菊自由身
玉京才過梨花節靈沼行春莫厭頻

用宋退傅張公閒遊靈沼探春回故事

春雪

幾日韶華雪更侵龍公試手本無心寒留整整斜斜態

暖入融融洩洩陰著柳直疑香絮重擁堦還似落花深
前頭桃李應無恙剝破相如買賦金

楸樹

道邊楸樹老龍形社酒澆來漸有靈只恐等閒風雨夜
怒隨雷電上青冥

七夕

天河唯有鵲橋通萬劫歡緣一瞬中惆悵五更仙馭遠
寂寥雲幄掩秋風

觀柘枝伎

腰鼓聲乾揭畫梁
綵雲擎出柘枝娘
簾間飛燕時窺影
鑑裏驚鷺易斷腸
輕細不妨重暈錦
迴旋還恐碎明璫
杖頭白雨催花急
拂散春風兩袖香

敏之兄詩 五首

敏之諱好古性識穎悟讀書能強記務為無所
不窺年二十就科舉時先東岩君已捐館太夫
人年在喜懼望其立門戶為甚切及再上不中

意殊不自聊又娶婦不諧日致惡語遂以狷介
得疾嘗作望月詩有莫恠更深仍坐待密雲或
有暫開時之句人或言詩境不開廣非佳語也
歎曰吾得年不永境趣能開廣否未幾没于北
兵之禍年三十一

中秋無月

佳辰無物慰相思先賞空吟昨夜詩莫恠更深仍坐待
密雲或有暫開時

讀裕之弟詩藁有鶯聲柳巷深之句漫題三詩其

後

阿翁醉語戲兒癡說著蟬詩也道竒吳下阿蒙非向日
新篇爭遣九泉知

又

鶯藏深樹只聞聲不著詩家畫不成慙愧阿兄無好語
五言城下把降旌

又

傳家詩學在諸郎剖腹留書死敢忘

先人臨終有剖腹留書之語

背

上錦囊三箭在直須千古說穿楊

題江村風雨圖

渡口舟橫水拍空墨雲傾雨樹號風江山不到紅塵眼
半幅煙綃想像中

附錄

自題中州集後

鄴下曹劉氣儘豪江東諸謝韻尤高若從華實評詩品

未便吳儂得錦袍

又

陶謝風流到百家
半山老眼淨無花
北人不拾江西唾
未要曾郎借齒牙

又

萬古騷人嘔肺肝
乾坤清氣得來難
詩家亦有長沙帖
莫作宣和閣本看

又

文章得失寸心知千古朱絃屬子期
愛殺溪南辛老子相從何止十年遲

又

平世何曾有裨官亂來史筆亦摧殘
百年遺藁天留在抱向空山掩淚看

中
州
集
卷
十

中州樂府集序

聲韻之流至於樂府不知其變其凡有幾漢房中樂昉
有斯名周人宮中樂章已奏闕雉鵲巢矣李唐而下其
變斯極按樂錄技錄樂府遺聲新聲所載瑟調楚調鏡
歌和歌正附幾五十門為魚龍鳥獸為車馬征戍為佳
麗怨思為蕃胡都邑神仙遊俠時景觴酌各若干十百
曲說者謂兩出塞蜀道難音響足比金石皆樂府曲諸
不易作也沈宋以降直至宋金元世至有以樂府名家

如吳彥高學士者矣中州樂府一帙蓋金尚書令史元遺山集也凡三十六人總一百二十四首以其父明德翁終焉人有小叙志之中間亦有一二憐材者文亦爾雅蓋金人小史也蜀左轄我儼山陸先生會計之暇目不瞬於檢閱偶得是編示余兌陽山樓曰金宋分疆程學行於南蘇學行於北一時文獻未可謂無人三百年來完顏立國淺陋故前為宋所掩後為元所壑使豪傑無聞焉甚可痛也編中譌誤煩為較讐與瑞成謀梓之

且以寓世變之感夫遺山當有金哀宗之季國步危促
宋知金仇之不可共而忘勅敵之不可親慘禍交臨不
幸生際其時與土者為之臣妾莫能奮飛悲憤于邑之
情可想也故其形之聲韻暢懷杯酒繫念君國多可哀
愍採風者所不棄也明妃烏孫主蔡琰之流皆以嬋娟
不能自謀遠嫁胡沙馬上之樂呻吟節拍世皆憐而存
之矧是編乎嗚呼王風國風由俗而變江河之趨也變
至檜陳亂極思治矣此仲尼刪詩意也然則我儼山先

生圖刻之意其重有感於是編乎其重有取於是編乎
嘉定守貴陽高登遂刻之九峯書院云

嘉靖十五年歲次丙申冬漢嘉後學彭汝寔拜書

欽定四庫全書薈要

中州樂府集

金元好問輯

吳學士激

人月圓

南朝千古傷心事猶唱後庭花舊時王謝堂前燕子飛
向誰家恍然一夢仙肌勝雪宮髻堆鴉江州司馬青
衫淚濕同是天涯

彥高北遷後為故宮人賦此時宇文叔通亦賦念奴
嬌先成而頗近鄙俚及見彥高此作茫然自失是後
人有求作樂府者叔通即批云吳郎近以樂府名天
下可往求之

訴衷情

夜寒茅店不成眠殘月照吟鞭黃花細雨時候催上渡
頭船鷗似雪水如天憶當年到家應是童稚牽衣笑
我華顛

春從天上来

海角飄零歎漢苑秦宮墜露飛螢夢回天上金屋銀屏
歌吹競舉青冥問當時遺譜有絕藝鼓瑟湘靈促哀彈
似林鷺啞啞山溜泠泠梨園太平樂府醉幾度春風
鬢變星星舞破中原塵飛滄海風雪萬里龍庭寫胡笳
幽怨人憔悴不似丹青酒微醒對一窓涼月燈火青熒
好問曾見王防禦公玉說彥高此詞句句用琵琶故
實引據甚明今忘之矣

滿庭芳

誰挽銀河青冥都洗故教獨步蒼蟾露華仙掌清淚向
人霑畫棟秋風嫋嫋飄桂子時入疎簾冰壺裏雲衣霧
鬢掬水弄春纖 猗猗成勝賞銀槃撥永寶鑑披奩待
不放揪梧影轉西簷坐上淋漓醉墨人人看老子揪髯
明年會清光未減白髮也休添

風流子

書劍憶游梁當時事底處不堪傷蘭楫嫩漪向吳南浦

杏花微雨窺宋東墻鳳城外燕隨青步障
絲惹紫游韁曲水古今禁烟前後莫雲樓閣
春草池塘回首斷回腸年芳但如霧鏡髮成
霜獨有蟻尊陶寫蝶夢悠賜聽出塞琵琶風
沙浙瀝寄書鴻鴈煙月微茫不似海門潮
信能到潯陽

蔡丞相松年

大江東去

離騷痛飲問人生佳處能消何物江左諸人
成底事空

想岩岩青壁五畝蒼烟一丘寒玉歲晚憂風雪西州扶
病至今悲感前傑 我夢卜築蕭閑覺來岩桂十里幽
香發魄磊胸中水與炭一酌春風都滅勝日神交悠然
得意離恨無毫髮古今同致永和徒記年月

又

倦游老眼放開身管領黃華三日客子秋高茅舍外滿
眼秋嵐欲滴澤國清霜澄江爽氣染出千林赤感時懷
古酒前一笑都釋 千古粟里高情雄豪割據戲馬空

陳迹醉裏誰能知
許事俯仰人間今
昔三弄胡床九層
飛觀喚取穿雲笛
涼蟾有意為人點
破空碧

水調歌頭

雲間貴公子玉骨秀橫秋
十年流落水雪香靄紫貂裘
燈火春城咫尺曉夢梅花消息
璽紙寫銀鈎老矣黃塵
眼如對白蘋洲
世間物惟有酒可忘憂
蕭閑一段歸
計佳處著君侯翠竹江村月上
但要綸巾鶴氅來往亦
風流醉墨薔薇露洒遍酒家樓

月華清

樓倚明河山蟠喬木故國秋光如水常記別時月冷半
山環珮到而今桂影尋人端好在竹西歌吹如醉望白
蘋風裏關山無際 可惜瓊瑤千里有少年玉人吟嘯
天外脂粉清輝冷射藕花水盡念老去鏡裏流年空解
道人生適意誰會更微雲疎雨空庭鶴唳

江神子慢

賦瑞香

紫雲點楓葉岩樹小婆娑歲寒節占高潔纖苞煖釀出

梅菟蘭鳧照濃碧茗盃添春花氣重芸窓晚濛濛浮霽
月小眠鼻觀先通廬山夢舊清絕 蕭閑平生淡泊獨
芳溫一念猶未哀歇種種陳迹而今老但覓茶煙禪榻
寄閑寂風外天花無夢也鴛鴦債從渠千萬劫夜寒回
施幽香與愁客

聲聲慢

涼陁
寄內

青蕪平野小雨千峰還成莫陁寒色裁剪芸窓憶得伴
人良夕遙憐幾重眉黛恨相逢少於行役梨花淚正宮

衣春瘦曉紅無力 應恠浮雲夫婿不解趣新醅醉眠
涼月怨入關河西去又傳音息誰知倦游心事向來年
苦思泉石人未老約閭峰多占秀碧

石州慢

高麗使
還日作

雲海蓬萊風霧鬢髮不假梳掠仙衣捲盡雲霓方見宮
腰纖弱心期得處世間言語非真海犀一點通寥廓無
物比情濃覓無情相博 離索曉來一枕餘香酒病賴
花醫却灑灑金尊收拾新愁重酌片帆雲影載將無際

關山夢寃應被揚花覺梅子雨絲絲滿江千樓閣

尉遲盃

紫雲暖恨翠雛珠樹雙栖晚小花靜院相逢的的風流
心眼紅潮照玉盃午香重草綠宮羅淡喜銀屏小語私
分麝月春心一點 華年共有好願何時定粧鬟暮雨
零亂夢似花飛人歸月冷一夜小山新怨劉郎興尋常
不淺況不似桃花春溪遠覺情隨曉馬東風病酒餘香
相半

金史四庫全書
卷一百一十五
一
鷓鴣天

清明綠野玉色明春酒燕地雪如沙為喚起斗南溫秀
鬢絲禪榻夢覺古揚州瑤臺路返魂香好在啼粧瘦
春前入眼似是章臺柳欲典鷓鴣裘悞金車香迎馬首
綠陰青子後日便東風秋千散莫寒生月到西廂後

鷓鴣天

解語宮花出畫簷酒尊風味為花甜誰憐夢好春如水
可奈香餘月入簾春漫漫酒厭厭曲終新恨到眉尖

此生願化雙瓊柱得近春風暖玉纖

又

秀樾橫塘十里香水花晚色靜年芳
胭脂雪瘦薰沈水
翡翠盤高走夜光
山黛遠月波長
莫雲秋影蘸瀟湘
醉魂應逐凌波夢
分付西風此夜涼

江城子

半年無夢到春溫
可憐人幾黃昏
想見玉徽風度更清
新翠射娉婷
雲八尺誰為寫五湖真
好風歸路軟紅

塵暖冰魂縷金裙喚起一天星月入金尊留取木樨花
上露揮醉墨洒行雲

公有詩八尺五湖明秀峰又云十丈琅玕倒冰玉明
年為寫五湖真正用此詞意魏道明作注義有不通
故表出之

蔡太常珪

江城子

王溫季自北都歸過
予三河坐中賦此

鵲聲迎客到庭除問誰歟故人車千里歸來塵色半征

裾珍重主人留客意
奴白飯馬青芻
東城入眼杏千株
雪模糊俯平湖
與子花間隨分倒金壺
歸報東垣詩社友
曾念我醉狂無

高內翰士談

玉樓春

為伯永作

少年人物江山秀
流落天涯今白首
形容憔悴不如初
文彩風流仍似舊
百花元是仙家酒
千歲靈根能益壽
都將萬事付天公
且伴老人閑笑口

減字木蘭花

西湖睡起飛絮游絲春老矣漲綠涵空十頃玻璃四面
風平時事少天與湖山供坐嘯他日西州却怕羊曇
感舊游

朝中措

瑯琊山色最清雄心賞待衰翁路轉峰回如畫新亭半
濕青紅風流賓從清閑歲月且共從容莫笑尊前老
大猶堪管領春風

劉內翰著

鷓鴣天

雪照山城玉指寒一聲羌管怨樓間江南幾度梅花發
人在天涯鬢已斑星點點月團團倒流河漢入盃盤
翰林風月三千首寄與吳姬忍淚看

趙內翰可

望海潮

代州南樓

雲朔南陔全趙幕府河山襟帶名藩有朱樓縹緲千雉

回旋雲度飛狐絕險天圍紫塞高寒弔興亡遺跡咫尺
西陵煙樹蒼然時移事改極目傷心不堪獨倚危闌
惟是年年飛燕霜雪知還樓上四時長好人生一世誰
閑故人有酒一尊高興不減東山

驀山溪

賦崇福荷花崇
福在太原晉溪

雲房西下天共滄波遠走馬記狂游正芙蓉平鋪鏡面
浮空欄檻招我倒芳尊看花醉把花歸扶路清香滿
水楓舊曲應逐歌塵散時節又新涼料開徧橫湖清淺

水姿好在莫道總無情殘月下曉風前有恨何人見

好事近

密雪聽窓知午醉晚來初覺人與膽瓶梅蕊共此時蕭
索倚窓閑看六花飛風輕止還作箇裏有詩誰會滿
踈籬寒雀

浣溪沙

擡轉爐薰自換香錦衾收拾却遮藏二年塵暗小鴛鴦
落木蕭蕭風似雨踈檣皎皎月如霜此時此夜最淒

涼

又

火冷薰爐香漸消更闌撥火更重燒
愁心心字兩俱焦
半世清狂無限事一窓風月可憐宵
燈殘花落夢無聊

望海潮

發高麗作

雲垂餘髮霞拖廣袂人間自有飛瓊三館俊游百銜高
選翩翩老阮才名銀漢會雙星尚相看脉脉似隔盈盈

醉玉添春夢雲同夜惜卿卿
離觴草草同傾記靈犀
舊曲曉枕餘醒海外九州郵亭一別此生未卜他生江
上數峯青悵斷雲殘雨不見高城二月遼陽芳草千里
路傍情

卜筮子

譜太
白詩

明月在青天借問今時幾但見宵從海上来不覺雲間
墜流水古今人共看皆如此唯願當歌對酒時長照
金尊裏

鷓鴣天

金絡閑穿御路楊青旗遙認醉中鄉可人自有迎門笑
下馬何妨索酒嘗春正好日初長一尊容我駐風光
歸來想像行雲處薄雨霏霏洒面涼

又

十頃平波溢岬青草香沙暖水雲晴輕衫短帽垂楊裏
楚酒相看別有情揮彩筆倒銀鉶花枝照眼句還成
老來旋減金釵興回施春光與後生

集句

鳳棲梧

霜樹重重青嶂小
高棟飛雲正在霜林杪
九日黃花才
過了一尊聊慰秋容老
翠色有無眉淡掃
身在西山
却愛東山好
流水極天橫
晚照酒闌望斷西河道

鄧干江

臨洮人

望海潮

上蘭州守

雲雷天塹金湯地
險名藩自古臯蘭營
屯繡錯山形
米聚喉襟百二秦關
鏖戰血猶殷
見陣雲冷落
時有鷗盤

靜塞樓頭曉月依舊玉弓彎
看看定遠西還有元戎
閩令上將齋壇區脫晝空
免零夕舉甘泉又報平安吹
笛虎牙閑且宴陪珠履歌
按雲鬟未拓興靈醉魂長繞
賀蘭山

任南麓詢

永遇樂

月已中秋菊還重九夜久涼重滿地清霜半天白曉孤
唱聞畊壠蕭蕭窓几依然琴硯但覺鼠窺風動悔生平

超前猛甚晚退却成無勇
興衰更換妍媸淆混造物
大相愚弄二釁羞人五交賈嚮侯伯寧無種而今此念
消除都盡惟有故山歸夢吾廬更雙溪清遶萬峰翠擁
馮臨海子翼

江城子

燕脂坡上月如鉤問青樓覓溫柔庭院深沈窓戶掩清
秋月下香雲嬌墮砌花氣重酒光浮清歌皓齒艷明
眸錦纏頭若為酬門外三更燈影立驂騑結習未忘吾

老矣煩惱夢赴東流

李承旨晏

婆羅門引

保德西樓作

汗融畏日豈知高處有風清倚闌襟袖涼生坐上看崩
雲脫壞不礙亂峰青待目窮千里却怕傷情 河汾古
城聽裂岬怒濤驚好是烽沈幽障鼓卧邊亭西樓老子
更無用胸中十萬兵酒到處莫放杯停

虞美人

佳人酒暈紅生頰
灩灩霞千疊
雨餘紅淚濕
黃昏誤認
當年人面倚朱門
飄零又送青春
莫悵望劉郎去教
人不恨五更風
只恨馬蹄無處避殘紅

鷓鴣天

苒苒萋萋雨後邨
芳塵不到五侯門
曾隨曉淚撩詩思
又向春風入燒痕
春去後憶王孫
啼紅南浦記芳溫
夕陽樓外連天遠
乞與騷人怨楚魂

菩薩蠻

回文

斷腸人去春將半歸客倦花飛小窓寒夢曉誰與畫愁眉

劉龍山仲尹

鷓鴣天

滿樹西風鎖建章官黃未裊前霜誰能載酒陪花使
終日尋香過苑墻修月客弄雲娘三吳清興入淋浪
草堂人病風流減自洗銅餅煮蜜嘗

又

騎鶴峰前第一人不應著意怨王孫當年艷態題詩處
好在香痕與淚痕 調鴈柱引蛾顰綠窓絃索合箏箏
砌臺歌舞陽春後明月朱扉幾斷魂

又

樓宇沉沉翠幾重 轆轤亭下落梧桐 川光帶晚虹 垂雨
樹影涵秋鵲 喚風 人不見 思何窮 斷腸今古 夕陽中
碧雲猶作山頭恨 一片西飛 一片東

又

璧月池南剪木栖六朝宮袖窄中宜新聲蹙巧蛾顰黛
纖指移簫鴈著絲朱戶小畫簾低細香輕夢隔涪溪
西風只道悲秋瘦却是西風未得知

南歌子

榴破猩肌血萱開鳳尾黃舊閑風簾雪肌涼一枕濃香
寃夢到巫陽雲紵描瑤草蓮腮洗玉漿碧梧深院小
藤床此意一江春水正難量

攤破浣溪沙

蠶欲眠時日已曛柔桑葉大綠團雲羅敷猶小陌上看行人
翠實低條梅弄色輕花吹攏麥初勻鳴鳩聲裏過
盡太平村

浣溪沙

貼體宮羅試袂衣水藍嬌淺染東池春風一把瘦腰支
戲鏤寶鈿呈翡翠笑拈金剪下酴醾最宜京兆畫新
眉

又

萬疊春山一寸心
章臺西去柳陰陰
藍橋特為好花尋
別後魚封煙漲濶
夢迴鸞翼海雲深
情知頓著有如

今

又

繡館人人倦踏青
粉垣深處簸錢聲
賣花門外綠陰輕
簾幙風柔飛燕燕
池塘花暖語鶯鶯
有誰知道一春

情

又

摩腹椎腰春事非
樂天猶恨小蠻歸
多生餘念向來癡
往事半隨殘夢轉
飛詞不盡短封題
竹奴應笑減腰

園

謁金門

簾半窳四座綠圍紅
簇歌盡玉臺連
夜燭懽緣仍恨促
休唱蓮舟新曲
煙水畫船搖綠
腸斷鴛鴦三十六
紫蒲相對浴

劉記室迎

烏夜啼

菱鑑玉篔秋月蕙爐銀葉朝雲宿醒人困屏山夢煙樹
小江村 翠甲未消蘭恨粉香不斷梅魂離愁分付殘
春雨花外泣黃昏

又

離恨遠縈揚柳夢魂長遶梨花青衫記得章臺月歸路
玉鞭斜 翠鏡啼痕印袖紅墻醉墨籠紗相逢不盡平
生事春思入琵琶

承旨党公

青玉案

紅莎綠萼春風餅
趁梅驛來雲嶺紫
桂岩空瓊竇冷佳
人却恨等閑分破
縹緲雙鸞影
一甌月露心魂醒更
送清歌助清興
痛飲休辭今夕永
與君洗盡滿襟煩暑
別作高寒境

感皇恩

賦疊
羅花

碧玉撚條藍袍裁
葉明艷黃深軟
金疊道衰仙子謫墮

金方口人
藥珠仙闕為春閑管領花時節
漢額粧穠楚腰舞怯
襞積裙餘舊宮褶東君著意留伴小庭風月任教鷓鴣
喚羣芳歌

鷓鴣天

雲步凌波小鳳鈎年年星漢踏清秋只緣巧極稀相見
底用人間乞巧樓天外事兩悠悠不應也作可憐愁
開簾放入窺窓月且盡新涼睡美休

感皇恩

一葉下梧桐新涼風露喜鵲橋成渺雲步舊家機杼巧
織紫綃如霧新愁還織就無重數 天上何年人間朝
莫回首星津又空渡盈盈別淚散作半空疎雨離魂都
付與秋將去

月上海棠

用前
人韻

傲霜枝裊團珠蕾冷香霏烟雨晚秋意蕭散繞東籬尚
彷彿見山清氣西風外夢到斜川栗里 斷霞魚尾明
秋水帶三兩飛鴻點烟際疎林颯秋聲似知人倦游無

味家何處落日西山紫翠

黃華王先生庭筠

大江東去

癸巳莫冬小
雪家集作

山堂晚色滿疎籬寒雀煙橫高樹小雪輕盈如解舞故
故穿簾入戶埽地燒香團樂一笑不道因風絮水漸生
研問誰先得佳句 有夢不到長安此心安穩只有歸
畊去試問雪溪無恙否十里淇園佳處修竹林邊寒梅
樹底准擬全家住柴門新月小橋誰埽歸路

謁金門

雙喜鵲幾報歸期
渾錯儘做舊愁都忘却
新愁何處著
瘦雪一痕墻角
青子已粧殘
萼不道枝頭無可落
東風猶作惡

鳳棲梧

哀柳疎疎苔滿地
十二闌干故國三千里
南去北來人
老矣短亭依舊殘陽裏
紫蟹黃柑真解事
似倩西風
勸我歸與未
王粲登臨寥落際
鴈飛不斷天連水

菩薩蠻

文迴

斷腸人恨餘香換塵暗鎖窓春小花簷月曉屏掩半山
青

又

客愁楓葉秋江隔行遠望高城故人新恨苦斜日晚啼
鴉

又

白雲孤映遙山碧樓倚一天秋斷腸隨鴈斷來鴈與書

回

清平樂

賦杏
花

今年春早到處花開了只有此枝春恰
到月底輕輦淺笑風流全似梅花承當
疎影橫斜夢想溪南溪北竹籬茅舍人
家

烏夜啼

淡煙疎雨新秋不禁愁記得青帘江上
酒家樓人不
住花無語水空流只有一雙檣燕肯相
留

訴衷情

夜涼清露滴梧桐
庭樹又西風
薰籠舊香猶在
曉帳暖
芙蓉雲淡薄
月朦朧
小簾攏
江湖殘夢半在南樓
畫角聲中

清平樂

應制

瓊枝瑤月簾捲黃金闕
宮鬢蛾兒雙翠葉
點綴離南闌
雪東風扇影低還
紅雲不隔天顏
夜夜華燈萬樹年
年碧海三山

水調歌頭

秋風禿林葉却與鬢生華十年長短亭裏落日冷邊笳
飛鴈白雲千里況是登山臨水無賴客思家獨鶴歸何
晚已後滿林鴉望蓬山雲海濶無涯安期玉鳥何
處袖有棗如瓜一笑那知許事且看尊前故態耳熱眼
生花肝肺出芒角漱墨作枯槎

謁金門

賦王
簪

秋蕭索燈火新涼簾幕翠被不禁臨曉薄南樓聞畫角

想見玉壺冰萼一夜西風開却夢覺烏啼殘月落幽
香無處著

王隱君礪

浣溪沙

夢中作

林樾人家急暮砧夕陽人影入江深倚闌疎快北風襟
雨自北山明處黑雲從白鳥去邊陰幾多秋思亂鄉

心

密國公璫

朝中措

襄陽古道灞陵橋詩興與秋高千古風流人物一時多
少雄豪 霜清玉塞雲飛隴首風落江臯夢到鳳皇臺
上山園故國週遭

春草碧

幾番風雨西城陌不見海棠紅梨花白底事勝賞忽忽
政自天付酒腸窄更笑老東君人間客 賴有玉管新
翻羅襟醉墨望中倚闌人如曾識舊夢回首何堪故苑

春光又陳迹
落盡後庭花
春草碧

青玉案

凍雲封却馳岡路
有誰訪溪梅去
夢裏疎香風似度
覺來誰見一窓涼
月瘦影無尋處
明朝畫筆江天莫定
向漁蓑得竒句
試問簾前深幾許
兒童笑道黃昏時候
猶是廉纖雨

秦樓月

寒仍暑
春來秋去無今古
無今古
梁臺風月汴堤烟雨

水涵天影秋如許夕陽低處征帆舉
征帆舉一行驚鴈數聲柔櫓

沁園春

壯歲耽書黃卷青燈留連寸陰到中年贏得清貧更甚
蒼顏明鏡白髮輕簪袖被蒙頭草鞋著脚風雨蕭蕭秋
意深淒涼否餅中匱粟指下忘琴 一篇梁父高吟看
谷變陵遷古又今便離騷經了靈光賦就行歌白雪愈
少知音試問先生如何即是布袖長垂不上襟披髯笑

一杯有味萬事無心

西江月

一百八般佛事二十四考中書山林朝市等區區著甚
來由自苦 過寺談此般若逢花倒箇葫蘆少時伶俐
老來愚萬事安於所遇

臨江仙

倦客更遭塵事冗故尋閑地婆娑一尊芳酒一聲歌盧
郎心未老潘令鬢先皤 醉向繁臺臺上問滿川細柳

新荷薰風樓閣夕陽多倚闌凝思久漁笛起烟波

禮部閑閑趙公秉文

水調歌頭

昔擬桐仙人王雲鶴贈予詩云寄與閑閑傲浪仙狂隨詩酒墮凡緣黃塵遮斷

來時路不到蓬山五百年其後玉龜山人云子前身赤城子也子因以詩寄之云玉龜山下古仙真許我天台一化身擬折玉蓮騎白鶴他年滄海看揚塵吾友趙禮部庭說丹陽子謂子再世蘇子美也赤城子則吾豈敢若子美則庶幾馬尚媿解翰微不及耳因作此以寄急馬

四明有狂客呼我謫仙人俗緣干却不盡回首落紅塵
我欲騎鯨歸去只恐神仙官府嫌我醉時嗔笑拍羣仙

手幾度夢中身 倚長松聊拂石坐看雲忽然黑霓落
手醉舞紫毫春寄語滄浪流水曾識閑閑居士好為濯
冠巾却返天台去華髮散麒麟

青杏兒

風雨替花愁風雨罷花也應休勸君莫惜花前醉今年
花謝明年花謝白了人頭 乘興兩三甌揀溪山好處
追遊但教有酒身無事有花也好無花也好選甚春秋

梅花引

過天門
闕作

山如峽天如席石顛樹老冰岬坼雪霏霏水洄洄先生
此道胡為乎來哉 石頭路滑馬蹄蹶昂頭貪看山奇
絕短童隨皺雙眉休說清寒形容想更饑

又

闕

杖頭倒挂一壺酒為問人家何處
有埒冰髯暖朝寒何人畫我霜天曉過關

大江東去

秋光一片問蒼蒼
桂影其中何物一
葉扁舟波萬頃
四顧粘天無壁叩
世長歌嫦娥欲下
萬里揮冰雪京塵
千丈可能容此人
傑
回首赤壁磯邊騎
鯨人去幾度山
花發澹澹長空今
古夢只有歸鴻明
滅我欲從公乘風
歸去散此麒麟髮
三山安在玉簫吹
斷明月

缺月挂疎桐

擬東坡作

烏鵲不多驚
貼貼風枝靜
珠貝橫空冷
不收半濕秋河
影
缺月墮幽窓
推枕驚深省
落葉蕭蕭聽
雨聲
簾外

霜華冷

秦樓月

簫聲苦簫聲吹斷夷山雨夷山雨人空不見吹臺歌舞
危樓目極傷平楚斷霞落日懷千古懷千古一杯還
酌信陵墳土

胥莘公鼎

阮郎歸

寄李都
運有之

人情冷暖共高低踈慵非所宜老夫碌碌本無機閑教

造物疑 形木槁鬢絲垂山林先有期故人只道挂冠
遲此心應不知

許司諫古

行香子

秋入鳴皋爽氣飄蕭挂衣冠初脫塵勞窓間巖岫看盡
昏朝夜山低晴山近曉山高 細數閑來幾處村醪醉
糝糊信手揮毫等閑陶寫問甚風騷樂因循能潦倒也

消搖

眼兒媚

濁醪第得玉為漿
風韻帶橙香
持盃笑道鶯黃似酒酒
似鶯黃
世緣老矣不思量
沈醉又何妨
臨風對月山
歌野調儘我踈狂

馮內翰延登

玉樓春

宴河中
瑞雲亭

長原迤邐孤麋卧
野色微茫河界破
草行繩履綠雲深
花觸飛丸紅雨妥
高亭初試煎茶火
醉玉漸華春滿

座行盃莫厭轉籌頻佳節等閑飛鳥過

溪南詩老卒愿

臨江仙

河山亭留別
欽叔裕之

誰識虎頭峰下客少年有意功名清朝無路到公卿蕭
蕭華屋白髮老諸生邂逅對床逢二妙揮毫落紙堪
驚他年聯袂上蓬瀛春風蓮燭莫忘此時情

李右司獻能

春草碧

紫簫吹破黃州月
款款小梅花飄香雪
窈莫花底風鬟
顏色如花命如葉
千里浣兵塵凌波襪
心事鑑影鸞
孤箏絃鴈絕
舊時雪堂人
今華髮斷腸金縷新
聲杯深不覺琉璃滑
醉夢遶南雲
花上蝶

江城梅花引

為飛伯賦青梅

漢宮嬌額倦塗黃
試新粧立昭陽
萼綠仙姿高髻碧羅
裳翠袖卷紗閑倚竹
暝雲合瓊枝薦莫涼
璧月浮香
搖玉浪拂春簾
瑩綺窓冰肌夜冷滑
無粟影轉斜廊冉

舟孤鴻烟水渺渺三湘青鳥不來天也老斷魂此夕清霜
靜楚江

浣溪沙

河中環勝樓感懷

垂柳陰陰水拍堤欲窮遠目望還迷平蕪盡處莫天低
萬里中原猶北顧十年長路却西歸倚樓懷抱有誰
知

王右司渥

水龍吟

從商帥國器獵同裕之賦

短衣匹馬清秋慣，曾射虎南山下。西風白水石鯨鱗，
山川圖畫千古神州。一時勝事，賓僚儒雅，快長堤萬弩。
平岡千騎波濤卷，魚龍夜落日孤城。鼓角笑歸來，長
圍初罷，風雲慘澹，貔貅得意，旌旗閑暇。萬里天河更須
一洗中原兵馬。看鞬橐鳴咽，咸陽道左，拜西還駕。

李扶風節

滿江紅

紙帳溫春，睡穩窓槐，搖綠吾老矣。不堪重著翠圍紅簇。

千古清風荆布在一家樂事糟糠足笑杜陵憔悴漫多情須燕玉求凰意傳新曲驂鸞夢從渠續問臨邛何賤會稽何辱畎畝豈無天下士斧斤不到山中木但莫教風雨兩雛鳩危枝宿

景覃

鳳棲梧

倦客情悰紛似縷小院無人卧聽秋蟲語歸意已攙新鴈去晚涼更作瀟瀟雨架上秋衣蠅點素冷菊戎裘

尚被春花妬別有溪山容杖屨等閑不許知人處

天香

市遠人稀林深犬吠山連水村幽寂田里安閑東隣西
舍准擬醉時歡適社祈雩禱有簫鼓喧天吹擊宿雨新
晴隴頭閑看露桑風麥無端晴亭莫驛恨連年此時
行役何似臨流蕭散緩衣輕幘炊黍烹雞自勞有脆綠
甘紅薦芳液夢裡春泉糟床夜滴

又

百歲中分流年過半塵勞繫人無盡桑柘周圍管茅低
架且喜水親山近倦飛高鳥算也有閑枝棲穩 紙帳
綉衾日高睡起懶梳蓬鬢閑堦土花碧潤緩芒屨恐傷
蝸蚓倒掩衡門空解草玄誰信俗駕輕雲易散賴獨有
蓬峰破孤悶世事悠悠從教莫問

宗室文卿

西江月

題邯鄲王化
呂仙翁祠堂

壁斷何人舊字爐寒隔歲殘香洞天人去海茫茫玩世

仙翁已往 西日長安道遠 春風趙國臺荒 行人誰不
悟黃梁依舊紅塵陌上

高博州憲

梅花引

蒿火目藜羹 腹書生 寧有封侯骨 長鬚奴 下澤車 艱關
險阻 誰教涉畏途 半生落莫長安道 一事無成雙鬢
老南轅 吳北轅 胡功名富貴情 知不可圖

又

槐堂夢鼓笛弄馳驟百年塵一闕陶淵明張季鷹一杯
濁酒馬知身後名 有溪可漁林可繳須信在家貧也
樂能門春澗江雲幾時作箇山間林下人

又

城下路淒風露今人犁田昔人墓岍頭沙帶蒹葭漫漫
昔時流水今人家 黃埃赤日長安道倦客無漿馬無
草開函關閉函關千古如何不見一人閑

又

六國擾三秦埽初謂商山遺四老馳單車致緘書裂荷
焚芟接武曳長裾 高陽真得杯中趣身到醉鄉安穩
處生忘形死忘名二豪侍側劉伶初未醒

王先生子可

小重山

子可自解極
霜脂粉也

寶榭簾鈎捲月窓縷衣金樣褪汎餘香卿卿榮耀寵恩
光三竿日顰翠楚山長 螺髻夏浮觴鳳奩塵瑩恨浥
煙霜賣珠樓外串離腸春殘夢今夜擬高唐

生查子

夜色明河靜好風來千里水殿謫仙人皓齒清歌起
前聲金箏中後聲銀河底一夜嶺頭雲遶遍樓前水
長相思

風暖時雨晴時熏褶羅衣人未歸
螭蛾愁欲飛
枕瓊霞瑣窓紗簾月樓空燕子家
春風掃落花

王監使特起

梅花引

山之麓河之曲一灣秀色盤虛谷水溶溶雨濛濛有人
行李蕭蕭落葉中人家籬落炊煙濕天外雲峰迷淡
碧野雲昏失前村溪橋路滑平沙沒舊痕

又

丹楓下瀟湘夜橫披省見王維畫畫無聲慘經營何如
幻我清寒此道行馬頭風急催行色疑是山靈嫌俗
客釣魚磯綠蓑衣有人坐弄滄浪猶未歸

趙內翰攄

南歌子

澗草萋萋綠林鶯恰恰啼汀沙過雨便無泥喚得芒鞋
隨意到前溪 浦溆渾堪畫雲烟總是題江湖老伴一
蓑衣真箇斜風細雨不須歸

虞美人

同五利
苑尋春

春來日日風成陣桃李飄零盡樹頭樹底覓殘紅只有
郭西梨雪照晴空 酬春須得如川酒酒債尋常有葛
巾歌側倩人扶大似浣花溪上醉騎驢

孟內翰宗獻

菩薩蠻

回文

睡驚秋近鳴蟲砌
蒼鬢摻勻霜影孤
燈翳冷長歎浩歌
狂

張太尉信甫

驀山溪

山河百二自古關中好
壯歲喜功名擁征鞍
雕裘繡帽時移事改
萍梗落江湖聽楚語
獸蠻歌往事知多少

蒼顏白髮故里欣重到老馬省曾行也頻嘶冷烟殘照
終南山色不改舊時青長安道一回來須信一回老

王玄佐

洞仙歌

賦
山所錄
綠寶屏

圓剛定質混物非凡類仁處其中靜忘意任蝶蜂狂繞
燕雀喧爭心君正惟取清白自治黃衣從澹泊此箇
家風異偶合陰陽棄神智怕旁人冷眼嫌太孤高樽俎
地聊許松梧同器待他日山林不相容請援手仙茆要

充仙贊

愚軒居士趙元

行香子

鏡裏流年綠變華
顛謝西山青眼依然
人生安用利鎖
名纏似燕營巢蜂課
蜜蟻爭羶
詞苑羣仙場屋
諸賢
看文章大筆如椽
閑人書冊且枕頭
眠有洗心經傳燈
錄坐忘篇

又

潦倒無聞坐慣家貧眼昏花心口猶存人皆笑我我儘
教人拚醉吟風閑釣月困眠雲 邂逅交親語款情真
且相從莫浪辛勤西山歸隱不用移文看菊成叢松結
子竹生孫

又

山擁垣墻水滿溪塘幾人家籬落斜陽又還夏也一霎
人忙正稻分畦蠶卸簇麥登場 老子徜徉閑日偏長
鬢蓬鬆只管尋涼綠陰何處旋旋移床有道邊槐門外

柳舍南桑

忻治中元禮

望海潮

從軍舟
中作

地雄河岳疆分韓晉潼關高壓秦頭山倚斷霞江吞絕
壁野煙縈帶滄洲虎旆擁貔貅看陣雲截岼霜氣橫秋
千雉巖城五更殘角月如鈎西風曉入貂裘恨儒冠
悞我却羨兜鍪六郡少年三明老將賀蘭烽火新收天
外岳連樓想斷雲橫曉誰識歸舟剝著黃金換酒羯鼓

醉涼州

先大夫

好事近

次蔡丞相韻首倡及高子文屬和附於此

夢破打門聲有客袖携團月喚起玉川高興煮松簷晴
雪蓬萊千古一清風人境兩超絕覺我胸中黃卷被
春雲香徹

又

天上賜金奩不減壑源三月午盃春風織手看一時

如雪 幽人只慣茂林前
松風聽清絕無奈十年黃
卷向枯腸搜徹

蔡丞相

又

誰打玉川門白絹斜封團月晴日小窓活火響一壺
春雪 可怜桑苧一生顛文字更清絕直擬駕風歸
去把三山登徹


高子文

聲音之道與政通固矣然以三百篇攷之成周治
矣而夫子不無刪焉鄭衛亂矣而夫子或有取焉

何哉則亦以天理之在人心不可變而人之賢不肖不可必故聖賢之所去取惟其人不惟其時惟其言不惟其人惟其意不惟其言中州樂府作於金人吳彥高輩雖當衰亂之極今味其辭意變而不移憫而不困婉而不迫達而不放正而不隨蓋古詩之餘響也是故儼山陸公有取焉亦孔子待鄭衛之意韶承命分技畢敬識淺語以俟公之教焉嘉靖丙申九月庚辰屬吏毛鳳韶謹書



中州樂府集



總校官庶吉士臣侍朝

校對官庶吉士臣陳壩

騰錄監生臣吳魯

騰錄監生臣章浴曾